

枕碧樓偶存稿

枕碧樓偶存稿卷八

詩二

蠟梅 壬戌

水邊籬落月微黃一樣霜中著意香
銅鉢笑催坡老句羽衣巧作素兒妝
戶排蠶瘦分脾晚杯泛鵝新到口忙古淡
不邀時俗賞膽瓶閒對讀書堂

客夢

迢迢羈旅身鬱鬱還鄉思莫道隔江湖夢中時一至

寓懷四首

湘水東流去杳然采蘭江上幾回沿
萋華忍作無家詠蓬梗眞同不繫船
窗下常臨求米帖杖頭誰貸買書錢
季鷹未遂蓴鱸志三楚句留別有緣

結廬陶令心偏遠隱市梅生迹許同
草與階平希過客花無帶掃住奚童
學荒卻恨蟬編少性拙何嫌獺祭工
麝炷

一爐書一卷不知門外馬嘶風

井間到處化爲墟
袞袞紅塵不可居
促膝漫談天下事
放懷且讀古人書
匣惟寶劍真知我
室有寒氊永伴予
莫道故鄉風景好
湖山回首倍懷如

不愁知己天涯少
鶯許爲鄰月作朋
一枕雲山尋舊夢
半窗風雨惜殘鐙
詩書而外客無好
鞠踞相將余未能
高詠太冲招隱句
漫持螯李笑於陵

題趙泉生

景應

劍馬障子

君今安用毛錐子
窗間老守經與史
君亦不用鐵兜鍪
行間齟齬戈與矛
雄姿獨出具神調
家學淵源本忠孝
胸中骯髒清尊澆
抱膝吾廬且歌嘯
決雲黯黯精氣馳
肉駿碾礪籠青絲
玉龍三尺雪光淬
天骨卓立殊權奇
按鐔攬轡讓儒雅
攬槍一掃清天下
據鞍顧盼烏足雄
拔刀斫地胡

爲者倚柱高歌代公篇起舞先著士雅鞭誰家畫手特精
妙英風颯颯縑素間慨自探丸柳江起血吮長蛇突封豕
壤雲飛來浙西東十郡官民向風靡蒼蒼若弁煙塵昏介
兄忠勇彌乾坤英雄殺賊本素志此身誓與城亡存兩載
環攻不能下古來豈讓銅梁門想君昔在重圍合親見指
揮萬眾集雲旂翠蕤耀火荼風度安和氣肅颯面承指示
方略奇敢笑書生小敵怯雄劍暗動馬矜嘶乘風破浪眞
男兒卽今披圖細把玩如在危城飛檄時愧我生平少智
慮銳志銷磨向誰語彈欽憔悴風塵間騎驢嬾向京華去
展君此圖意縱橫張目爲君進一觥范葵競爽君記取淩
煙名字照千古

題某女史蛺蝶卷子

生來香國曉雲繁試舞東風廿四番偶謫人間成小夢長

留花裏寄歸魂詩傳謝子新詞寫圖補滕王舊樣翻一笑
霜紉思撲取宛然春意滿南園

片片飛花灑綠蕪成團逐隊趁如駒六朝才子誰能賦三
月春光盡入圖握筆漫教誇薛媛傳神端合想麻姑此中
暉是江南路活色生香態不殊

閨中秋夜陰雨

老桂餘香繞畫闌連宵風雨二分寒天公愛惜團圓相未
許人間兩度看

歌管誰家喜復招楚天涼夜思迢迢如將一曲嬌娥怨譜
入箏絃第九條

穆王笛向何人借欲泛靈槎路阻長料得重雲最深處羣
仙依舊譜霓裳

秋雨

擁衾不成夢涼思動今宵之子處幽迴秋風增寂寥孤鐙
熒悄悄落木和蕭蕭莫向空山聽羈魂聲裏銷

客有自賊中歸而就婚者卻寄三十韻

代趙六

身世逢艱厄滄桑屢變遷不堪揮塵客亦遇枕戈年消息
悲新鬼風流隸散仙羣牟輝棣萼盧李託因緣記枉胥山
駕來浮霅水船花飛人面雨草擁馬蹏煙北里歌方好西
冷景更妍豈圖春旆駐恰值夕烽連太息瓶都罄淒涼瓦
不全勢真同蛹縛計且學龍跼間道飛能渡危城卻復前
又嗟籠玉兔未易脫金蟬落魄袍誰贈窮途履盡穿吹簫
聊爾耳出網豈徒然黃浦風剛暖吳淞月正圓天倫欣翕
聚此日慶生還纔穩征鴻夢將彈引鳳弦雀屏圖早射鵲
石夕新填書到愁悰訴緘開別恨牽讀君詞吧吧感我思
綿綿鞀鼓三江急塵氛兩浙延鄉關歸瓦礫骨肉泣刀鋌

桑梓情徒切萍蓬迹自憐幾時珠得返相與襁重聯此去
藍橋路應開翠帳筵秦臺簫細奏葛幕鏡高懸隄柳何須
折毗蘭那足牽旣齊梁氏案仍著祖生鞭徙海終酬志懷
湘儻賦過攜尊訴離緒定可慰心痛

題彭生舉杯邀明月圖

銀河淡無色絨雲淨八極中天白玉盤小時不曾識酒星
一夜謫人問力士鏘映琥珀殷蟻觀一世不足侶且邀明
月來雲闕清光四面集與我相拱揖几席孰主賓永夕伴
花立與酣意氣凌九州此生誰與營糟邱祇應築向廣寒
府與月終天相唱酬仙才逸氣冠今古我今問之爲起舞
君不見天津橋南之酒樓猶興清虛宮闕同千古彭生側
儻真不羣飄飄舉袂齊青雲上界誰操玉斧修花間忍使
酒船焚謫仙人已騎鯨去明月仍照徘徊處搔首還結無

情遊揮杯勸影自容與壯心寄一壺妙手寫成圖卽此尺
幅中奇氣猶盤紆安得乘風到碧海琉璃萬頃雲五采揮
手把天瓢瑤池宴尙在玉樹之華長丰茸結璘仙子紛相
從紫雲曲奏方諸宮何事寂寞坐此林下席年年飛輦醺
金風

殘花

癸亥

樹上空留楚楚青客來猶自立閒庭惜春心事憑誰訴收
拾殘枝聚一瓶
飛茵墮溷多前定莫向東風喚奈何差喜近依春水曲飄
零還得逐清波

四月二十六日自湘首塗入黔泊喬口鎮

在長沙縣西北六十

里水程九十里喬口河
自益陽來經此達湘

賈生舊恨長沙遠我別長沙更遠征斜日依依高口成長

流渺渺益陽城笑看山色如眉嫵涼挹波光似掌平三尺
短橈西楮去渡頭風定暮煙輕

二十七日紀行

南風晨挂帆行百四十里瞬息過沅江午景未移晷舟轉
南入湖風逆艱尺咫記里甫及十義馭迫濛汜水程間早
晚疾遲判若是盈虛如轉環此理悟相倚

藍溪夜行

一統志藍溪在沅陵縣南七里今水程二十里

萬壑不鳴鑼舟行鏡裏天煙雲連底活星月倒垂圓苦別
又聞笛長歌時扣舷青山容嘯傲應傍老漁眠

度黔江

此江之船頭右高於左尾左高於右頗似螺形

舟形肖卷螺下灘疾於矢白浪高如山傾洄打船尾

紀行四首

迂道黔蜀疆道迂復疑阻川嶺多紛歧羽書正旁午賊巢

何槃槃前途戒商旅徒行炎赫中揮箠汗成雨紆回避賊
走取道點江渚篋輿載輕舟役夫共囊褚龔灘險而長志龔灘在思南府城北二百五十里一名琦塔灘亂石橫江濤險十餘里龔灘鎮在酉陽州西一百八十里蓋黔蜀接壤處奇石森伍伍衝煙疾擢下鼓浪一炊黍江山拓胸懷
不道行路苦停撓問前程甘霖喜滌暑

一葉乘流輕濤奔若飛練午辭龔灘鎮暮宿彭水縣烏江
自南來天工逞怪變石蛇鹿角連木棱土腦間名灘處處
惡耳駭目尤眩形狀異黔楚其險竝希見舟依古城下魂
定夢乃善明朝解纜去前路多潰泥

我來江口鎮

屬彭水縣

遙指眞安州江路到此穩

黔江過江口鎮皆安流矣

遵陸偏舍舟人家住山頂高寒堪衣裘行行入林箐衣上
雲氣浮盤互千百轉危磴迂而幽聞道今年春家室傷虔
劉戔戔龍將軍連營擁貔貅軍出三江渚直到東門頭畏

賊乃如虎遇民儼尋僻所過肆焚掠井邑爲荒邱駐輿長
太息恤緯良增憂關城暮夜宿鼓聲聽援炮

解裝綬陽縣去賊纔數里逆旅無可容稅駕縣衙裏前行
到播州賊去蹤仍邇兼程趨賊前晨征暮方止荒村住茅
店治食尙未已謗言賊兵來滿村驚遠徙主人囊橐行客
子難臥起徒步出門去怪雨濡衣履徑仄石犖确巖險坡
謠詭滑達屢顛躓頂踵如沃水三更雨意息山場憩行李
詰旦烏江濱且容拂塵滓

送朱益甫希鳳入楚

蕭灑湖山主迢迢萬里游賀囊工嘯詠蓄榻喜旬留小聚
情非淺真誠世寡儔嚴城刁斗急長觸故鄉愁

征旆何恩促周旋未判年豈同萍水合苦見埃烽連秋雨
增離緒春風結後緣約君湘濟去同泛北游船

對菊感舊

先師閔連莊先生有花癖尤愛菊秋時必購百餘種供書室中函丈之前當獲領略清趣今遠游竹國向野人家移植數十本疊作小山嘉賓宴集髣髴如昨而先師謝世已兩載矣瘦影相對不禁愴然

瘴雨蠻煙裏籬東也有花卻因芳訊早難忘昔游賒種好還能記香稀未足誇都下菊之香者有蘭陵酒米金管二種今並無飛觴頻脫帽非復綰雙丁

疊得峰三面依稀侍坐時久深梁木痛忍賦落英辭遺草鞠人誥師嘗集書經作鞠誥一篇悽懷花太醫師蒔花妙道嘗作養花記宣南尋舊夢猶自傍繡帷人比之花太醫

貴陽有感十首

羣山拱護竹王祠斗大孤城鎮遠陲千里邱墟多鬼哭九
年戈甲等兒嬉苗民逆命精誠格大吏承恩廟算施豈少
安邊書入告九重猶繫聖人思

鳳銜丹詔下鸞臺開府西南仗異才側目共看韓掾去建
牙爭識魏公來不教腹削師桑孔自有聲名邁汲崔前席
先籌甄將佐輕裘緩帶陣雲開

玉華峰下筍輿經清水江頭戰血腥借寇民都思愛日平
蠻天未斂妖星危城保障鬚全白古戍蕭條草自青休說
乖西山色好尙聞羣盜集畚丁

且蘭舊治峙東方六載兵民百戰強不道降奴逞狙詐遂
教小醜肆鴟張斷頭共哭將軍死塗腦誰憐士卒傷健令
縱能嚴阨守下游餘燼已披昌

潛師直博息鳴刁萬士銜枚走六宵入穴但知擒虎急焚

巢爭道阿龍超渠魁朱縛機難得孤壘無援恨不消卷旆
歸來偏整暇三軍勇氣薄雲霄

將軍東下仗旌麾倍道西援戴月馳范老威聲寒賊膽羊
公夙望慰人思百宜寨裏連營壯頂照山前畫角悲戰敗
餘氛渡江去負岫猶敢抗王師

甕城橋畔會雄兵蠹爾么麼尙敢撓飛旆摩雲齊變色征
袍澣血不聞聲中宵已報投戈遁列陣何妨緩轡行戰馬
騰驤騎士飽便當赤手縛長鯨

手持龍節下南天聖主深恩起左遷風月清談宗庾亮爪
牙威勢蓄嚴年治兵勝算歸操縱柔遠嘉謨費幹旋共道
公廉能體國卻教別度使君錢

背鬼子弟出衡湘婦女隨軍氣不揚諸將非無稀突勇干
營曾比虎賁強捷書空說降黃佐酋長何人縛鬼章豈是

晉師甘退舍連宵棄甲太倉皇

局分黑白算通盤籌餉徵兵術已殫書檄休騰三捷喜瘡
痍須念萬家殘有鄰早慮求金絀臨渴方知掘井難斬斷
情絲須慧劍莫將私暱監登壇

感賦三首

連天烽火逼城隈鞞鼓聲酸盡角哀小醜跳梁偏有技元
戎飛檄豈無才登陴五夜城烏寂蜚語三人市虎猜淮雨
別風難逆料趨庭且覆掌中杯

苔岑結契太差池寵負前魚妄詆媒婦巧難供無米爨官
貧翻致愛錢疑嬰城方效張巡節賭墅還臨謝傅棋笑讀
中山狼一傳腹藏鱗甲本難知

塵昏星斗黯無光昨夜珠璣遇角張何術竟與三里霧有
花獨傲九秋霜顏公乞米薪傳帖趙子無錢笑擲囊林鳥

漫呼行不得青衣江畔理歸航

十二月二十七日立春上元甲子第一日也率成一

律

喜作宜春帖龍躔甲子推人心盡思治天意定潛移劫換
紅羊火祥徵青鼠詞讖詩云平安鼠火重興萬方齊額手快睹太平
時

清鎮縣哀何孝廉

甲子

甘爲鄉閭死鴻毛命太輕予遺會有幾吞啖觸饑鯨

鎮西衛

午無炊所暮無廬茅店荒村劫火餘落落誰爲東道主一

椽聊假葛仙居

時寓藥肆

大定雪行

蒼莽萬山圍長途滯客駢寒雲隨雪卷凍雨雜冰飛徑斷

村容失峰連鳥迹稀早春消息逗猶未換征衣

度赤虺河

俗呼赤水聲之轉也此川黔分界處一統志赤水河在永寧縣東一百八十里吳國

倫題白崖驛詩赤水南辭三峽連雙魚爲寄楚江東原注赤水卽赤虺河源出荒部經蜀川合流入楚

我從雪中來山圍光璀璨子才瓦礫場掩映情尤惋劫餘
灰未寒旅夢悽欲斷今渡赤虺河汝容殊淡澹冷暖中峰
分陰晴一水判麥苗已蔥蔥桃萼復粲粲南畝多耕犁老
屋盛煙爨莫謂村落繁亦曾罹寇難豈眞爲賊憐幸未同
魚爛征途化險夷方寸轉撓亂世事逢顛危局外空扼腕
行止皆由天喜悼亦各半旅魂少安舒壯游眞漫汗中夜
起舞時荒雞隔嶺喚

二十七日磨盤山道中鳥跋東上出行來第一遭也

慨賦長句

黔山高與蜀山連千里沈陰不計年兵火難期他日靖客
旌卻喜早春懸縱來嶂疊巒重地好是雲開日見天莫笑
勞人情草草一肩行李意蕭然

雪山關

一統志雪山在永甯縣東一百里
雪山關在縣東一百六十餘里

石磴回盤鳥不翔玉峰高迴接天間層冰霑積千年雨峭
冷林飛六月霜古寺華鯨鳴乍過長途疲馬走還僵何如
塞外探奇景萬里寒雲擁大荒

敘永廳

列屏山翠疊匹絹瀑流懸盡攬南番勝扶筇夕照邊

瀘州弔許參謀

彪孫

俞興作帥高曹盡劉整驍雄遂入元愧殺譙周草降表朱
臣還有許彪孫

重慶府

言言城堞古渝州襟帶三江控上游
畫地雲封余玠壘
梳風送子顏舟銅鑼峽口春潮長
華蓋山頭夕照收
南極黔涪西夔道佛圖關勢鎖咽喉

鄧都縣

山深林木窳仙境訪平都
鹿鹿還來往王陰迹已蕪

夔州府

峽勢下荆巫江流日夜徂
三遷工部宅八陣武鄉圖
鵲血鴈春早猿帶月孤不堪寒柝裏
苦調咎巴渝

空舸峽

一統志在歸州東南四十里

三峽猿聲午夜聞
竹枝唱徹楚山雲
詩家妙悟新城老
言象胥忘自不羣

到長沙後將入都

牂牁江口汨羅陰
杖履追隨拓素襟
會結左思招隱念
更

傷王粲遠游心難忘積習攬書籠怕聽哀歌扣劍鐔此日
挂帆江海去春暉忍讀孟郊吟

登岳陽樓

湖水東流去斯樓萬古存五言高杜孟千里下湘沅碧落
浮空潤青山入吐吞同懷渺何處獨此一憑軒

過金陵

時粵賊占據官軍圍合未復

鯨鯢負固尙稽誅上將旌旗曜火荼盼殺江頭馳露布要
看破陣作新圖

戢戢巨艦浪雲開畫角聲中夕景積帆影若飛摩壘下恍
如壁上縱觀來

上海縣

吳淞江上聚滕隲學士橋邊互市通別是一番新世界圖
編王會萬方同

煙臺訪心岸居士留別三章

舊夢宣南記幾回
雪泥天末斷鴻鴉
三年磨竭鐵中住
萬里乘鰲海上來
別久頻教驚喜并
語多總以亂離該
時艱一面千金值
門外驪駒且漫催

筆末長懸研不肥
秋風依舊褐爲衣
桂林羞對銀蟾照
杏苑空看玉燕飛

居士以杏林雙燕微翮見贈

游子生涯隨處覓
使君高

誼近來稀自憐卜式功名薄
望斷蓬瀛青瑣闥

綠槐高處一蟬鳴
又敞離筵促去程
靜攝羨君成慧業
土居

喜寓金剛經

奔馳笑我爲浮名
廣渠門畔車塵俗
鏡海樓前水

月清

居士新建樓于煙臺山麓顏曰鏡海

日下正多青島使
雙魚還許故人

烹

閏端午 乙丑

風景桃源信有諸
香番好結白雲居
赤靈符是仙人佩
今

歲山中兩度書

六月十九日出都宿通州

冒暑輕裝發細塵逐馬蹏南薰橋下路斜日白河西

出大沽口遇風雨

怪雨連天勢重雲雜沓圍颶風掀浪起陰火作芒飛汨汨
鼉鼉駭茫茫島嶼微中宵餘怒恣伏枕夢多違

重度清水洋

又逢曉策六鰲時折取扶桑若木枝

是日觀日出

海底老龍應

笑我壯遊如此不題詩

扶病入場

遠踰江海賦歸來獻藝風簷寸晷催扶病莫嫌腰瘦損月

明三五強銜杯

湖上感賦

山色湖光黯淡愁西風容易又殘秋荒亭寂寞泉空咽斷
碣模糊客徧搜煙擁平橋天棘滿雲封古殿瓦松稠我來
欲問句留處石徑蒼涼夕照收

夾山漾秋汎

秋高放棹白雲隈殘戍西風獵獵催一樹斜陽紅斷處道
場山翠入船來

哭吉甫五首

人生若浮雲聚散洵無端飢來驅我去別君辭長安方謂
暫分手豈知會面難踟躕執君裾欲去仍盤桓悲風颯然
來一語含辛酸生別意惻惻死別淚瀾瀾神往形已隔永
訣當何言莫歌蒿里曲曲罷徒增歎

君病歷九夏我爲君隱憂和緩不在世暮雲增遠愁我行
何咨且將俟君疾瘳疾瘳不可俟秋風催行舟我來君款

洽我去君挽留，忽然不忍顧。猶聞慰藉周，亦知別離苦。乃爲家室謀，冥冥負君意。撫心更誰尤。

昨夜夢君來，君來越江海。別君幾何時，顏色幸未改。恍惚平生歡，執手情疊疊。君言復嗚咽，沈疴竟不起。阿母棄兒去，音容固如在。阿耶無大兒，又鮮同母弟。百兩御新婦，遲遲行復待。朝露溘然至，何人奉先祀。老父痛兒深，痛哭不復兒。心尙有知親，心曷以解絮。語慘未答，雞聲徧鄰里。落月屋梁明，君言猶在耳。

造物生豪俊，由來非偶然。將令輔清時，後武踵前賢。一第始發軔，士衡作賦年。壯盛竟難恃，遽了今生緣。旣賦絕世姿，曷爲天其天。浩浩陰陽移，壽殤理難詮。我欲叩蒼穹，蒼穹默不宣。將無茫昧中，天道固有偏。

海內索知心，知心久寥寂。抱此孤介姿，所如遭揮斥。惟君

察區區相視成莫逆君性厭紛華我亦愛泉石我性惡浮
薄君亦喜樸直春華良可寶努力崇明德置身三代上積
風盡變易方期竟此志驟來惡消息夜聞鐙施餘欹歔展
遺墨平生道義交斯人難再得我欲招君魂迢迢關塞隔
魂今好歸來楓月明故國總帷曠遺影猶自念疇昔夢繞
松陵墟人琴杳難識

曉過青浦縣城 丙寅

晨光泱泱上城頭兩岸人家屋枕流無限煙波三泖接軋
鴉臥聽艣聲柔

松江府

張翰思鄉味秋風斫鱸廚我來春過半不見四腮鱸

華亭谷

扶筇步訪華亭谷村舍蒼涼對夕曛依舊機雲山色好當

年鶴唳那堪聞

登煙臺山

絕頂握衣上新亭快壯觀舳艫通萬國島嶼接三韓
蜃氣吞殘戍鯨波撼畫欄連鰲如可釣東海學投竿

煙臺雜詠五首

羣峰接杳茫指點田橫寨有士五百人豈甘伍樊噲
鼉鼉架爲梁周王涉弱水何必此石船冥頑不能駛
西望遷巢谷秦時徑已荒尋碑渺何處荏苒厄風霜
振策蛤蜊山間鐘蛤蜊寺石竇酌仙漿滿屨雲生翠
不見安期生來訪重陽子爭說築仙宮希聞倒仙履

紫竹林

瀕海千年地不毛誰教斥鹵變豐膏普陀山色招難得惟
向精藍薦素醪

通州雜詠四首

延芳村外延芳淀百里煙波訪故遼暑意未徂涼意動采

菱歌裏泛輕橈

延芳淀

仗前雲擁只孫衣齊上高臺縱獵歸唱到呼鷹來一曲雄

狐魂斷草深肥

呼鷹臺

人生到此總魂銷杖策來登南浦橋楊柳依依偏有意絆

人還挂萬千條

南浦橋

風帆百幅馬千蹏石壩東連土壩低辛苦天倉般運力莫

將珠玉雜沙泥石壩土壩

通州試院戲作四絕句

平生足未踣虞庠此日風簷費校量走馬看花纔一霎漫

將命運論文章

蟲書鳥篆太支離大誥盤庚佶屈奇濡墨吮毫粗點斧一

行官燭四更時

張冠李戴洵奇事西抹東塗有祕傳篇幅未終真絕倒奚
奴背笑阿儂顛

過眼戰場迷五色未聞方叔怨東坡但教不把初心負滄
海遺珠莫遽訶

秋仲移居大安南營

巢痕新卜日南坊容膝能安陋不妨室有遺書剛插架門
多老樹不成行默觀大化悲秋士閒訪遺村近海王曲巷
自來車轍寡嬾隨徵逐少年場

漫賦

戊辰

西來秋色最蕭疏人境脩然也結廬靜約樹聲風緊處寒
留花影月明初青衫落拓貧非病白眼掄挪壯不如欲向
崆峒倚長劍半生豪氣未消除

白雲南望願難賒
索米長安感歲華
絲筆何曾干氣象
破書依舊寄生涯
身非騏驥才甘讓
心在鱸魚夢轉差
塔古亭高歸去好
碧湖煙水共浮家

乞巧詞

此夜年年會女牛
銀河耿耿絳雲收
人心幻出無窮巧
猶向璇宮乞未休

隨園圖

己巳

清涼山色明如泚
風月不用一錢買
天教仙吏作詩人
高臥此中詔不起
拋卻西湖舊夢疏
草堂築向煙霞區
山重水複詩難寫
柳暗花明畫不如
況有文章壓蔣趙
海內巨公盡傾倒
獵酒徵歌無已時
竭來都說隨園好
物換星移六十春
主人老去鶯花新
不須苦作平泉戒
鶴老依然守故園
柳江輦鼓聲聲苦
勝地無端付一炬
低回空憶武龍

臺花亦無言鶯不語賴有賢孫作畫工雲煙黳黷生綃中
昔年風景今何在夢裏家山畫裏逢綠淨軒中春雨細柏
亭柳谷秋風異勝景猶疑在眼前一洗平生胸芥蒂吁嗟
平梓澤蘭亭舉目非蒼茫獨立對斜暉祇今寫入丹青裏
文采風流想見之

枕碧樓偶存稿卷九

詩三

擬左太沖詠史詩八首 辛未

結髮聞道義萬卷勤鉛丹微妙參天人指畫策治安中朝
布綱紀羽翼羅羣賢既懷澄清志焉肯辭艱難高眎屬霄
漢矯若凌風翰悠悠不足貴立身青雲間文化紀梁父武
功勒燕然時平謝主組高臥城南山

青青嶺上竹灼灼堂中花勁節屏山野薄植升天家高足
據要津志士躬桑麻時命實不同苑枯何足嗟梁竇竊世
譽帶礪要聲華潛夫著名論終使餐煙霞

吾思公儀休家不畜杼機吾慕鍾離意朝不拜珠璣人生
既用世此節當慎持蟬蛻塵埃外清風疇可希一介且不
取干駟休相遺彼哉羊舌鮒篋錦空爾爲

紫衝竦輕轡朱門回畫輪相逢多禮數所貢非常珍朝登

田竇堂暮隨衛霍塵某也進開府某也作將軍南陽諸葛
廬座無素心人懷抱觀今古章句非所論才大管樂比志
高伊呂倫德輝攬千仞鸞鳳真無羣

登高望閭闔宮闕凌雲煙馳道列千級峻極難躋攀此中
有捷徑可以任往還自非識途者何由得爭先鍵戶謝世
事高蹤追孔顏升嶽小諸峰浮海隘百川

君平隱蜀市下簾閱春秋曠懷厭塵世邈焉無所求未爲
中行士高風已寡傳視彼營營徒泰山與蟻邱巧者雄其
智歧路終貽羞拙者守其雌虛室終無尤

子真上書歸遯爲吳市卒仲叔投劾行不因司徒出子慶
擲楯歎恥爲俗吏屈大春閉關隱不通列侯謁古人審去
就匪由意激越方其立志始矯矯願名節所如縱得咎委
蛇終不屑俯仰天地寬長吟獨抱膝

逸驥騰夷路安能服鹽車修鱗赴長川安能集枯渠皎皎
遺世士自與庸俗殊襟期信浩蕩陋彼局促駒憂樂天下
重毀譽羣兒愚苟爲世所棄脩然賦遂初馮衍陳素志京
房進忠謨鑿枘不相容始合終見疏玉洁良有待何必執
人裾委心以任運嶮巇皆坦途

擬山谷演雅

翡翠耀輝竟委羽鸛鶴效人解起舞螻能漂邑患至微蚊
欲負山力不舉囊中錢盡青蚨遁囊裏醴酸黃蚋聚脈望
三生骨難換鞠通一曲聲可譜顛當守門術工巧精衛銜
石志消沮從游蜻鳥未忘機集苑蓼蟲不知苦螢火照書
差可用蝸涎成字原無補鷓鴣一枝聊棲遲服翼千歲終
塵土昏夜方牟黿鼉利春秋難與螭蛄語告余不好鳩爲
媒請對以臆鵬入戶尺蠖求伸甘自屈賓鴻不逝孰貽阻

盈室居然走伊威。嘯血那堪聞杜宇。報喜豈無朝見螭。嫁禍須防夜吹蠱。鴟惡幾曾見。化鳳蛸。縮翻言能制虎石蛰。暗泣是王孫。露蠍毒噬稱主簿。蝮螫墜地太冥頑。鵙旦號寒素。誇詡叩頭僕僕良可哀。比翼鶉鶉未得所。奇鷹健翮。條鏃縛斥鷃。醜羽焚籬處。飛蜺嘶蜚。悉尋常家鷺。野鳬等朽腐。天空地濶白雲間。孤鶴翩翩真寡侶。

魚醫

臨流結屋小如巢。倚岸施醫水勢交。數尺竿懸紅蓼渚。四垂綸罟綠楊梢。溪鱗灑潯煙痕動。網眼縱橫月影淆。何必澹臺操劍起。清湫深處釣寒蛟。

蟹斷

江鄉稻熟雁來天。獵獵西風蟹舍連。三尺短筴篩夜月。一星幽火點寒煙。曲藏岸影疑無路。界斷波痕不礙船。縱使

橫行齊入穀綠橙搓手快登筵

采芝圖 代

莫莫高山巔雲霞孕瑤藥五色揚光輝靈秀冠眾卉世無
地行仙弃捐不見采君今寄遐思短鋤攜鴉背把此玉蕤
歸古抱絕塵滓豈其慕石隱高蹈軼黃綺豈其歌芝房嘉
祥示鴻侈張圖識君像疇能會君旨聞君崇令德執事必
求是卜式家財輸魯連眾難解落落襟期高足以勵澆詭
寸莖可療饑瓊液勝芳醴欲持此靈根徧療我桑梓乃知
圖成時超然蘊妙理德門善氣應休徵符素履壽考形詩
歌科名兆孫子何必耕芝田乘雲到瀛海卽此尺幅中隱
隱發奇彩

湖上雜詩 壬申

一掬石根泉新焙淪龍井不改在山清何嫌透心冷

冷泉

天留一線明愚夫終不悟空虛物穆中那得知其故

天一緒

飛來欲飛去但見峰靈奇不問飛來處安論飛去時

飛來

山僧善長嘯古洞倚雲根六意既能靜何須呼老猿

呼猿

其質本冥頑其形皆鬼域吾推忠武心豈屑羅階側

岳墳

煙環孤嶼深塵外尋幽契特立想高蹤生平無附麗

孤山

高人迹已希鶴去亭空在既具凌霄姿終須離塵海

放鶴亭

蒼蒼曲徑深杳杳輕風送幽絕數聲鐘喚回塵世夢

南山屏

水檻風櫺敞湖光四面來箇中清意味載得一船回

湖心亭

蘇隄接白隄打槳水雲暮若得作閒人便向湖中住

蘇隄

訪取斯堂坟址

堂爲外王父俞文節公故宅在杭州上興忠巷

宅依屐嶺占名泉杖履追隨記昔年砥行恪循諸葛誠論

文勤讀史公編傷心碧血沾襟地回首青鐙繼晷天別石

披榛空想像招魂難續楚騷篇

俞文節公墓

拱木陰懷宿草平，碧峰環衛夕陽明。
階前芳醞寒初醕，燼後遺編錄未成。
不分浮華推宅相，還將文字念平生。
羊曇重到西州路，零落山邱涕泗橫。

重九有懷兩弟時久不得家書

甲戌

舊館商飈拂翠筠，道場山色九秋新。
遙知此日題糕字，念著京華旅食人。

插萸卻少王摩詰，簪菊應憐杜牧之。
知否輭紅香土裏，登高無興也無詩。

有懷寄示兩弟

丙子

清宵步月杜工部，寒食看花韋左司。
我亦欲尋歸夢去，碧湖花月慰相思。

答子文

飢來驅我復何之乞米長安歲月馳夕照金臺殘葉下秋
風碧浪破帆遲新詩卻寄三千里舊夢重尋十二時不到
千山今六載青青松柏好扶持

題畫扇

丁丑

雲歸野渡悄無人村外山光雨後新占得綠楊深處住三
分流水一分春

髣髴苦邪溪上去柳陰路曲是人家村容如水山如畫門
對寒流白板斜

曲港垂綸不繫船平林綠蘆碧於煙笛聲吹出漁家傲水
轉山岡又一天

渺渺煙波淡欲無賣魚聲裏聽提壺此中若住元眞子便
乞扁舟泛碧湖

四十初度率賦五章

己卯

雪泥鴻爪訊從頭彈指光陰去不留碩望未能追馬鄭高
蹤安得附羊求知還倦鳥歸深樹學釣靈鰲信直鉤卅載
蹉跎終莫補勞勞塵世等浮漚

朱門冠蓋集嚴終躡迹香塵逐輭紅癡夢爭尋蕉下鹿豪
情笑叱柳前驄強彈馮鋏聲難就妄學齊竽曲豈工勦業
行藏何限事倚樓看鏡寂寥中

踽涼情狀最堪嗤燕市騎驢彳亍時敢謂芝蘭參臭味豈
防瓜李避嫌疑詩書結契真偏淡酒肉論交久易離鍼曲
枉教磁石引朱絃三歎證心期

夢裏家山也當歸客中情事是耶非偶沽濁酒供清酌爲
買新書典舊衣兒耐齋鹽方索笑妻甘荆布亦知幾碧湖
風物難忘卻鱸膾初登蟹漸肥

雲司匏繫歲華遷早悟朱絲暗裏牽小草知難供世用散

材幸得遂天年疲驂偃蹇驅常後老鶴毵毵舞不前漫道
塵機無日息此生終結看山緣

六月二十四日同人招遊十剎海午飲慶和堂卽席

口占二律

是日賓主皆同司徐乃秋何松僧潘安濤邵竹村皆有和作甲申

新秋先到最高臺

是月十七日立秋

退食同驅薄笨來古岸柳疏

偏有態曲廊花淨總無埃城邊山色濃于黛檻外湖光重
若醅促膝休談軍國事當筵且勸掌中杯

涼陰靄靄覆橫塘十畝花香接稻香綺序恰逢初度好靜
觀自有不言芳忖共楫良非偶漫說應官爾許忙撲去
輟紅塵幾斗勝遊占得水雲鄉

擬老杜諸將五首

用原韻

唐時郡縣漢河山五季搶擄始設關尙待金函頒且下永
留銅柱鎮雲間武襄壁壘秋風肅黔國旌旗夕照殷自古

巖疆承正朔陪臣猶得覲天顏

貔貅十萬頓邊城五夜風清卷旆旌豈謂不曾逢一虜譁
然遂已走千兵漫嗟殺氣蠻中惡猶喜煙塵宇內清每聽
鼓鼙思將帥臨戎誰是李西平

富良江外起狼烽漏雨殲雲戰壘重誇誕未聞誅馬謖桀
驁枉自斬劉封維州險隘雖云失勃海諸胥尙足供悉怛
謀降須駕馭莫教解甲事耕農

麟閣何人姓氏標日南兵氣未能消經年毒霧沈丹徼昨
歲妖星動碧寥塞隧詎無左司馬漏師偏有寺人貂扶苓
比景休輕棄曾奉先皇玉帛朝

連朝飛電羽書來芳嶺峰頭畫角哀江靜血腥橫島嶼夜
深燐火滿樓臺時危競上平戎策戰苦難擎飲至杯九省
兵戈方未艾籌邊慎莫付庸材

李慕臯招飲於淨業湖

卽十刹海

香遠益清小榭

慶和卽

席書懷兼呈徐乃秋何忞僧

乙酉八月初九日

殘荷留得葉縱橫勝地重來動客情
畫閣參差都倚樹平湖蒼莽半依城
露葵綠逞秋光媚風柳青梳午氣清
佳日難逢休沐暇躋地簪組此飛觥

雪泥陳迹記前年

酬唱曾經擘鳳箋漢上鳴騶欣作郡

鍾友

琴出守襄陽

江頭駕鯉愴登仙

武悅堂主政沒於江中

浮雲聚散懷同侶

塵海升沈數昔賢

是日酒酣歷數敘雪堂諸君子不勝今昔存亡之感

四座停杯論

往事光陰彈指感推遷

千鱗聲望重雲樓好客攜尊結勝游
大復詩名齊顧鄭偉

長文筆邁曹劉論交幸得同官好
對景翻添故國愁最憶

西風鱸正美年年孤負碧湖秋

忞僧以二閘觀荷詩出示憶丁卯九夏與客放舟閘

下不覺二十年矣流光已去歸夢難成慨賦長句

卽用原韻

泥聽籠銅鼓報衙尋芳每惜日西斜多君逃暑香擎藕記
我追涼巧臨瓜廿載似塵催逝景萬人如海慣浮家客中
略說鄉關事六月苕溪勝若邪

九月同人集飲江亭乃秋賦詩紀游謹依原唱倒用

前韻 丙戌

瑟瑟寒雲正作秋荻花楓葉不勝愁歸鴻渚遠詩吟謝戲
馬臺高會憶劉令節又逢開口笑近郊難得賞心游數聲
吹徹重陰散恰是臨風笛倚樓是日晨陰午霽
隔座笛聲嘹亮

館臨初地勝陽逕象外探幽集眾賢石壁尋詩人已古壁
有石刻船山
諸故老詩金爐決識語都仙亭東文昌閣有集唐安排
賢詩籤句夢九卜焉觴政招紅友商略碑文搨素箋亭後園內有金代石幢亭
東北有香冢嬰武冢二碣

甲子細論同算亥定煩小錄作疑年

同座十四人酒半各說行年

休嗤酩酊醉瑤觥秋後登臨氣倍清

酒後登城靄靄遙村連古

苑依依殘照下寒城蘆碕入畫添幽興菊墅催詩寄遠情

和到玉臺新詠句想君健筆意縱橫

香冢在江亭東北隅有碑碑陰題碧血詞詞極哀無

姓氏年月其側有嬰武冢小碣爲記讀碣上文言

嬰武粵產也九日與忞僧訪得之忞僧各繫以詩

依用其韻

流水飛鳥處當年絕代人空留碑上字誰識鏡中眞花悴

香埋土蘆荒夜聚燐那堪題碧血無復舊羅巾

香冢

迢迢來嶺海畫閣惜離羣況復遺靈蛻悽然傍短墳三生

誇辯慧一夢謝塵紛芳草萋萋處西風起暮雲

嬰武冢

詠史 丁亥

瓦器紛紛送柴車得行貴爲新室傳情節飾虛名
侍講華光殿重來作帝師靈琨開異苑一疏進良規
枉說眞龍種羶官困督郵蒲萄新釀熟赫叵去涼州

六月九日同鮑敦夫陳書玉二太史邀李越縵農部
遊南河泡宿雨不果移席江亭

宿雨驅炎歊開軒綠萬頃清風四面至習習吹衣領觀荷
願未遂來此賞幽迴酒深客忘歸敲冰復煮茗回望城西
山白雲接溟濤

十七日南河泡觀荷

廣渠門西南二里許有蓮花塘廣可百餘畝俗呼
南河泡又曰寶泉舊隸奉宸苑近年有王雨亭者
佃種之時荷種稻築室數楹于其中遂爲都人士
銷夏游宴之所一統志云百泉溪在宛平縣西南

十里麗澤關平地有泉十餘穴匯而成溪京城古蹟考云豐臺在宛平縣西自柳村俞村樂吉橋一帶有水田橋東有園其南有荷花池牆外俱水田種稻至蔣家街爲故大學士王熙別業其季家廟張家路口樊家村之西北地畝半種花卉半種瓜蔬劉村西南爲禮部官地泉脈從水頭莊來今此地未知卽古蹟考之荷花池否其風景固彷彿也火雲碑兀生奇峰炎林赫赫歛霧封十丈黃埃卷地起勞勞車馬相追從看荷共說城西好偶乘休沐遂幽討出郭南行二三里曲徑縈紆循古道數椽占得陂中央四面陂寬百畝強老榆高柳翠相抱平隄迴合清流長舞風裳兮牽水佩萬柄花開錦世界游魚灑潏鷗意閒荇絲菱線自縈帶野航剛受人雨三隨波轉入花中探細鱗不聞爽氣

發波光演漾花光愁隄外水田將綠繞清影鱗鱗鏡開曉
方勝似鄧秧似鉞髣髴江鄉風物早主人言是郎邪王卜
居來此逾十霜此陂久隸奉宸宛年年還納官租糧每年納租
銀五有亭翼然出林表飛甍揭嶸接飛鳥遺構建自乾隆
初逸事流傳問故老我聞城南尺五天風流盛會追昔年
春秋佳日觴詠集相公別業王文靖將軍園祖氏樂吉橋東
早荷放樊劉俞柳村相望悠悠塵世幾桑田勝地低回轉
悽愴夕陽旣西筵復開陂光澈豔浮金杯花深點點鳥飛
度林靜雪嘒嘒鳴催人生難遇是幽賞奚爲局促在塵埃
簿領回回無了時安得此中長偃仰

九日閩夢九招飲江亭

彭澤香餐菊藍田醉把萸從來逢令節難得是清娛槐柳
秋風老亭臺落日孤但教腰腳健奚事念榮枯夢九每有升沈之感

去秋游江亭公僧賦香冢嬰武冢二詩余步其韻後
遇李越縵言嘗問之守冢老嫗香冢乃張筌陔侍
御盛藻之妾嬰武同時所瘞也今秋復游江亭瞽
目老僧言二冢實侍御所作香冢埋殘花嬰武冢
則侍御南臺疏稿花神廟亦侍御所建隸江亭故
言之能詳復賦二絕句

槐柳蕭森蔭一邱數楹祠宇徑通幽葬花心事無人說賸
有殘僧已白頭

平生瀛盡萇弘血權作名山冊府藏死後聲名誰管得冥
冥呵護仗花王

臘八日京察過堂計自甲子到部入過堂矣口占二
律呈乃秋曹長

登場傀儡暗牽絲郎府依烏迹景馳題柱名誰田鳳嫗停

年格漫左雄訾七條絃激琴曾奏九轉丹成鼎尙遲廿四
韶華同一瞬前塵似漆渺難知

何自爲郎濫備員磨驢陳迹踏年年幸逢儒雅同曹選喜
誦清新好句傳守拙分居靈運後蜚聲多愧照鄰前于今
西府寒蟬噤鳴鳳朝陽待上賢

疊前韻答乃秋少鼎

難將別調寫琴絲贏得虛聲日下馳勞我以生原是幻送
人作郡又何訾漸鴻先路爭相逐老驥長途到豈遲珍重
榮名金石壽素心未許眾人知

雲亭聯步廁常員射策金鑒最少年怕說遠游偏我久

每

江南風物少鼎輒慨然不樂余作客三十餘年矣又將何以爲情乎愛吟佳什向人傳哀時
庚信情何極薄宦馮唐齒在前三復新詩梅鶴句愧無清

德繼高賢

將赴敍雪堂在奉天司與乃秋話司中事率成二絕句

慣爲他人作嫁衣年年壓綫計全非而今才下隨班去羽
換宮移曲又希

五年共楫簿書忙難得同心話一堂最是酒邊與詩後依
依遼海好春光

郭存甫改官畿輔賦詩留別依韻奉和 己丑

雲亭共楫感華年如火榴紅照去鞭曾補遺文參晉令余
制字集就競推碩望邁馮顓紫鐘常聽穿花韻君充秋審
肩商訂直隆宗門風笛爭歌折柳篇往事思量最惆悵把莢觴詠
歷年最久

九秋天

古貌冰心耐久朋詩前酒後動離情鳧飛北闕新承寵魚
出西沽舊得名毛檄捧時伸孝養處琴彈處頌神明料知

官閣閒無事竹柏春春證夙盟

薛雲階少司寇隨扈東陵派充隨員閏二月十四日

出都

先行二十三日還都途中口占十絕句

庚寅

旗影鸞聲去不停雪花相送出郊坰今年春比常年晚柳
色纔黃未變青

塔影搖空日已西潞河南畔促輪蹄紅欄隔岸遙相接煙
鎖平橋壓水低

龍旗高卓拂雲煙鶴列無譁鷺序聯忽聽傳籌呼二里千
官齊集禁門前

夜認鎧光晝認旗各標新樣記曹司引繩爲界風原古萬
幄分行布若棋

石磴營紆輦道清琳宮高聳接丹甍聲音帳靜營門肅萬
馬雲屯總不驚

銀花十里夜光寒
鶴燄騰霄放眼看
皎若繁星圓若月
滿山鎗彩構奇觀

複岫層巒疊四圍
晴沙風卷雜雲飛
三春氣候兼冬夏
宵著重裘午葛衣

揭漿道左示煌煌
履畝蠲租率舊章
畚揭經營休說苦
聖朝德澤本汪洋

御史祠堂聖勳新
剏門風雨弔孤臣
史魚尸諫芳標遠
莫道今人讓古人

寒食清明幾日過
郊原天氣漸融和
桃花乍放紅霞薄
榆莢初圓綠蔭多

題楊韻樓清流作鑒圖

煙波舊與白鷗盟
沙石粼粼徹底清
觀我觀人原一樣
此中妍醜最分明

閒支竹杖看清流雲影天光一鑑收養得此心常活撥那
分萬派與源頭

壘塊何須用酒澆滿腔俗慮自能消空明一片無纖翳對
此方知識界超

長松如叟石如仙獨坐臨流思悄然此意是誰能識得故
教寫向畫圖傳

留得青氈短榻安蕭蕭斗室一鐙寒願將不息川流句說
與愚蒙子細看

重游南河泡

壬辰閏六月張勤
巖鹿遂儕招飲

共攜尊榼郭西游夾道蟬鳴便覺幽簪組暫拋城市遠
來同訪水雲秋

雪堂盛會記追攀塵夢三年瞬息間今日重尋鵲爪印依
然野老候柴關

高槐四合竹成行垂柳毵毵覆短牆更喜重陰留得住新涼滿院好開觴

舫船纔進百分空豪飲如鯨意氣雄觴政儼同軍政肅滿筵都在指揮中

今年苦雨似前年種芡休言勝種蓮舍北舍南花正好不愁難納水衡錢

半篙新漲綠如醅數頃陂寬放艇回芡葉離披蓼葉亂煙波恍泛玉湖來

水田翻似學僧衣雨後秧痕綠正肥仿佛故鄉風物好此身渾在畫中歸

勝游難得是同官座上杯空興未闌卻向瓜畦花徑外雨三點雨送歸鞍

王虎文馮悅軒招遊北河抱觀荷雨甚不果往午飲

於天甯寺塔射山房

七月七日

方坤吾首唱索和卽步

其韻

郊原氣已變新爽驅鬱蒸爲厭城市囂客裏動秋興共說
北陂好地僻占幽勝殘荷三四里晨葩吐瑤孕豈知豐隆
怒黑雲壓塗徑命駕還踟躕雨聲隔簾聽

看荷幽旣阻探幽到野寺松柏若膏沐滿衣撥濃翠入座
生微涼綠醕佐紅芰疇謂阮嗣宗遺俗道在醉坡公三蕉
葉歡言亦何愧身外同浮雲會得酒中意

臨觴動鄉思倦懷三徑荒胡爲苦形役人海漸軀藏近慚
流水逝遠愧飛雲翔孤蟬苦已歇歸鳥方成行故園渺何
處江河廣無梁登此清淨境洗我干結腸

雲樓久聯襪同志快相得賞雨來山房四座觀酒德古塔
說隨季遺臺緬昌國遠樹鷺秋光暮煙起寒色方干發新

詠清曠出中臆陽春竟難和長歌巾欲側

墨龍歌

黑雲壓舍日光變堂上乃有真龍見窺頭拖尾葉公走左
攫右拏起素練古來畫龍誰最奇霽霄烈裔名先馳不與
赤龍張目寫僧絲雙龍點睛飛後來畫者亦傲兀孫位陳
容竝傑出神物情狀窮追摹心通變化已忘筆華堂當畫
開吳練崢嶸頭角垂長髯誰家意匠特雄放磊落想見胸
不凡一龍蜿蜒驤首仰水隨雲氣潼瀚上翠巖中挾腥雨
飛魚鯁半空墮三兩一龍穴前踞石蹲昂頭望雲意欲吞
怒爪奮張草木靡山谷震駭波濤掀數龍恍忽見若隱微
濶細霽看不盡甲鱗偶露雲重重白氣瀾漫雜蛟蜃古人
畫水兼畫龍寒風颯颯生屋東墨瀋淋漓意飛動杳冥疑
有神靈從君不見真龍起騰階尺木崑崙朝發孟諸宿飛

潛躍見何須與豈因泥塗竟踰伏修鱗九九符純陽百怪
避匿陰魅藏時乘御天六轡頓尺澤之鯢安足量

潘問樓出詩相示大有牢落之感卽步其韻以答之
漫說官場似積薪雲樓偏許著吟身久爲日下蜚英客同
是風塵溷迹人折獄良才聲望重登瀛異數品題新敘雪
步向係提調囚人坐辨四人看減等三人近年愧無鄒衍
額外添行走之員遂無定數今年共十八人雕龍手吹律能回黍谷春

前詩既答重有所感復疊前韻二首以質問樓

莫論前薪與後薪輒紅疇是自由身趨衙而外無多暑作
郡從來慣送人願助清名三代古靜觀世態百般新塵纒
絆我肩難卸抱牘雲亭廿九春

負荷懷慚舊析薪牽絲未許便抽身論交幸有知心友閱
世偏多冷眼人爭望雲霄尋路遠閒攜霜葉寫詩新魯戈

難返西馳曜菊又榮秋竹又春

問樓以新春遣懷二律見示卽步其韻 癸巳

番風早送隔年春客舍偏驚百態新故里空留三畝宅知
交半是二毛人案多積牘休嗤俗家有遺書不算貧慙愧
雲亭過十耆流光奄忽若飈塵

譽咎全無學括囊最多憂患是名場屈平尙欲隨鴛馬甄
宇由來取瘦羊薄宦久經諳世味高歌翻羨作詩狂柳芽
將茁花將發好把香醪薦木皇

出守津郡留別同人

雲亭抱牘點朝班荏苒韶華已卅年交淡偏多同志樂援
疏幸遇長官賢謬登上考虛聲負慚敘勞資異數遷此日
一麾津海去何時重與話尊前

寶店口占

莫嗤見卯求時夜荒店先謀二卯難是日求雞卵不得粗土人言水荒之故粗
糲但能供一飽何須苦戀大官餐

松林店早行

四更漏轉策霜蹠雪淨沙平月色低滿目荒萊生計苦連
村到曉不聞雞

初到保定戲題

久習京曹禮數寬驟儕外吏整衣冠強持手版趨踰拙細
認頭銜辨別難細想昔年都會盛幸逢今日海疆安循良
遺蹟儀龔遂報最應慚詠素餐

稿九終

枕碧樓偶存稿卷十

詩四

心岸居士七十九壽言二十四首

甲午

盛代魁奇出扶輿間氣鍾翰屏歌嶽降世胃朔姬宗冊載
思敷歷三朝念奮庸幸聯盧李好祝羨意彌重

夙慧知名早長征萬里溟忝游霞客記射策子由年文字
偏希遇班聯且備員宦途初發軔來往潞河邊

浩淼桑乾水城樓拱北辰展禽官惜小扁鵲術稱仁道本
能醫國方多可活人蠲囚知感泣著手便成春

研究靈蘭祕聲名達九重薦書傳羽鶴清漏聽銅龍視脈
宮闈肅評方御墨濃天威顏咫尺垂問語從容

墨綬銅符燦居然古邑侯聲馳龐統驥訟息魯恭牛風驛
三津送雲帆萬舳收序勞階疊晉夙抱定能酬

孰使猱升木侏離語幻咙簡書趨渤海籌筆瘁淞江口舌

爭何力干戈氣已降馳驅憐缺掌歸路送吳艘

舊是平昌郡山城喜佩符階痕閒上草鞭影靜懸蒲駕海
鯨波沸跳梁鼠輩誅吏民皆案階四境頌聲孚

沽水自潯湘爭迎竹馬來災黎蘇藥石惡俗靖椎埋續懋
邀殊眷時艱仗異才簞鑪猶未變龍節去青萊

之罘高擁翠地勢控東溟浴日臨諸島凌雲聳一亭敵謀
潛欲逞隱患弭無形不惜斷斷辯嘉謀貢大廷

東海雄關啟新銜樞使尊桑研懲刻覈草創甬仁恩風靜
帆檣集澤同島嶼吞遠人胥悅服輿論至公存

六年敷惠政遷秩重鹽官力恤民生苦心籌國計難苛徵

除孔僅名論采桓寬觴詠明湖上間情四坐歌

福上還加福

居士邵子
神數語

嘉辭信有徵榕城朝日煥柏府夕

煙徵入讞祥刑慎三遷寵眷膺旬宣洵異數撫馭惕冰兢

政令中書出香凝畫省清瘡瘕勞煦嫗供億費權衡九郡
登仁域羣僚仰至誠王尊標勁節共揖契平生

邪靡謀何狡潛師渡海來折衝操勝算參畫著丰裁地沃
資林藪天荒闢草萊毋滋他族逼都會赤嵌開

宛宛新移節江天畫鷁飛位仍居岳牧職更領封圻旭日
臨牙戟和風卷彩旂共瞻行部至漢上柳依依

里閭三年住江城又建牙煙波楓荻冷風日豫樟賒峻潔
持清操稽逋責勢家珠犀猜蕙苒飛語妄相加

六月鵬搏息鴻噉滿故都流移編戶口羸弱越江湖競發
韓韶廩爭坡鄭俠圖獨攄康濟策生活萬人呼

帝念邊疆重安危仗老成玉屏勤露冕金筑駐霓旌營列
千山靖民輸兩稅輕廿人圖喜授美利惠蚩氓

克慰懸車志林園賦遂初無田歸亦好有道樂非虛祕籍

仙真契家庭歲月舒閒中留翰墨揮灑右軍書

賢智李文姬璇閨耀令儀笑顰誠不苟勤儉夙堪師蘋藻
修芳薦芝蘭擢素粧含飴看繞膝鴻案慶齊眉

薛氏誇三鳳都非百里才卽令占宅相卻喜聚英台樵稅
湖邊住乘槎江上回鳴騶無棣郡先奉省符催

海內耆英仰由來令問宜降寅逢慶月算亥過華年我佛
生同託天尊福正延閣軒秋氣兆風肅月輪圓

鶴蓋集仙曹義義甲第高安期呈火棗曼倩獻冰桃甘醴
傳金爵奇音奏玉璫轡軒歌竝作詞客願揮毫

領郡叨非分摩挲手植棠賓筵欣起舞宦轍阻稱觴玉枝
精神健銀函敘述詳期頤還作頌更續壽人章

有感六首

辛廖未契八風龜言發盈廷議出師指畫局中推老算牙

開塞上等兒嬉雄罷合遣鬚獅搏飛兔誰教跛鼃追回首
湘淮諸將帥不堪今日又聽鼙

漢家疆域屬幽州沮水初平四郡收天佑朱蒙開版宇土
分青社樹王侯訪求舊俗嫻弓馬仰望中朝拜冕旒欲問
荀楊遺壘處蕭蕭風起荻蘆秋

大同江上水泓泓飛渡何須縛木罌獨有史儒能效節公
言楊鎬不知兵碧隲館外軍容墨風月樓邊殺氣橫養士
金錢過百萬于思棄甲聽輿評

鼉磯島接海雲東旌旆悠悠夕照中險列千山修壁壘曲
藏一水聚藤蘿卻看對馬師方出不道文龍帳已空爭說
乾元九節度堂堂郭李亦無功

大凌河外列營連刁斗森嚴起暮煙有士從軍橫槊賦幾
人移戍枕戈眠輕言決戰唐房琯垂老臨戎漢馬賢一夜

數驚神志定帳中高臥壁何堅

休言絳灌戰功多引領三邊聽凱歌未見元戎求衛霍已
聞愛將戮樊何軍衛能扼摩天嶺勝算難尋望海堦寄語
塞垣諸父老由來師克在人和

九月保定郡試率成長篇示龔達夫太守壽昌及襄
校諸公丁酉

直沽棟花老郡試齊諸生清河菊方茂諸生齊會城一年
試兩郡儼亦持文衡此郡學十七附以駐防兵濟濟三千
餘銳志躋庠黌文字驟填委五色真迷睛高軒集羣彥令
譽何航航秦晉齊魯吳滇池共遼京何時襄校者爲大令
西李子藩蔭垣郭芝山鍾秀山東王鏡海襄清隨越嶺文
煜李經畬士田江蘇李肅溪映庚顯熙芝炳寰雲南揚西
林雲卿奉天太守斯翰手渤海傳家聲襄校資眾力菁萃
田綺閣鴻文
尤持平窮日費搜討午夜神屏營遺珠庶無憾月旦符公

評鎖院清畫靜活火茶剛烹興酣發狂言四筵且勿驚國
家尙文教取士沿前明細想初盛時人人知治經克聞聖
賢旨頗頌詩書精發爲經世業廊廟多耆英積久法遂敝
遠越先民程三通廿四史高閣徒充盈剽竊與塗抹土飯
塵爲羹矯矯蓬嶠選楷法尤風行浮華獵世譽輕俊要科
名持此以用世所用非所能自治且未足遠略疇能勝故
紘聲不調張之貴乎更窮通通則變易義含恢弘因循翫
歲月異說將縱橫及時各自奮庶幾道能興我知廟堂上
柱石多忠貞愆忘固所戒虛車亦當懲仔肩肯獨負風氣
開林烝聞者噤不語但覺心忤忤蒿目亦徒爾壘塊消何
曾白衣正送酒且進龍頭鎗詰朝試事畢霜氣凝空庭
合覆郡士以不知誰是謫仙才命題得知字達夫首

唱排律相示依韻奉酬

孤負東籬菊搜才鎖院時謫仙誰可侶名士定相知謬許
銅符綰慙將玉尺持同心延眾妙巨眼抉羣疑檢點千篇
富評量五夜遲雌黃操月旦太白想風期藥榜明朝看蓬
壺異日思使星懸朗鑑臭味莫參池

夜宿信安鎮贈逆旅主人

瓦屋數椽田數頃不求非分舉家歡豈如宦海勞勞者雪
虐風饕夢未安

題安麓村舊搨孫過庭書譜後

唐孫過庭書譜墨迹國初孫退谷得之西川後轉
入真定梁蕉林相國家乾隆丙戌天津安麓村岐
購之梁氏迄今又百餘年不知流落何所矣石刻
宋時有兩本一秘閣續帖本稍肥一太清樓本稍
瘦明代已稱難得退谷猶獲此兩本見庚子銷夏

記中亦希世之珍也明刻有文氏停雲館本國初
有海昌陳氏玉煙堂本竝非精品惟安氏以墨迹
鈎勒上石遂出文陳之上乾隆戊寅歙人汪令聞
廷璋得其石後歸江鶴亭家南城會賓谷方伯轉
運揚州又從江氏得之攜歸南城此後搨本遂鮮
嘉慶庚午長白毓春圃都轉興藏有安氏搨本倩
錢梅溪泳重刻於揚州視安本略瘦世亦重之然
不若安本之精神完固也毓石今歸天津鹽商張
氏珍爲至寶尋常不能得其搨本安石歸南城後
歷經兵火不知尙在人間否此冊爲越中孫越樵
舊藏尙是安氏原搨陳伯平觀察啟泰有跋語甚
推重之觀察臨摹書譜有夙癖其相賞有真矣

絕壑丹崖早擅名夏蟲休錄寶家評當年真迹今何在空

說孫梁賞鑑精

宋時祕閣太清樓兩本爭傳內府收玉躡金題歸劫火人
間零落幾春秋

安家沾水草堂開會乞中山墨妙來搨得硬黃留樂石不
教神物溷塵埃

晴窗展卷露英光宗派原來出二王文氏停雲猶影響何
須更數玉煙堂

邗江覆本屬梅溪燕瘦環肥費品題若識廬山真面目漫
登野鷺厭家雞

君家舊物守青氈林道書名重潁川
晉陳達字林道工愧草書見宣和書譜
我未窺章草祕且將故事寫蠻箋

清河道舊署建於康熙四十一年有韓文懿公
葵碑

文紀事

戊戌

慕廬文筆擅當時別薛剡苔共讀碑閒坐豆棚諸父老爭
將舊事說康熙

六月初九日書事

銅虎符分使廨雄枉將經始記韓公許田璧假謀何狡漢
寺經來事詎同及此竟非孤始願不矜疇與汝爭功臨漪
亭北蓮池側遺碣摩挲夕照紅

景教東來孰厲階枉申高議眾相排和宮遠仿唐祇寺耶
第弘開漢橐街鼉吼但聞長夜鼓虎頭空憶舊時牌荒祠
寂寞英靈護留得清陰覆古槐

牽牛花

一笑嫣然露氣含明河耿耿月西南小名呼作勤娘子籬
角剛開花雨三

書事

之奇盡室行伯玉近關出君子見幾作必不俟終食哀哉
襍穢子營營競觸熱浮名嬰網羅羈絆曷遺脫白首竟同
歸青山慘埋骨千秋萬歲後疇秉董狐筆

題楊忠愍家書墨迹手卷

存容城祠堂

義景何曾照覆盆獨留浩氣至今存直聲能礙東樓魄忠
悃難忘北闕恩諫草久經傳樂石家書長得守賢孫代夫
疏語尤悽惻恨未當年達九閭

十一月十六日月蝕周子迪廉訪作詩示僚屬散步

其韻

司天既可算從頭鉦鼓儀陳等杞憂地軸朦朧虛影隔天文
揭要云月繞地轉至與日相衝且入地日引長之切線則
月必入地影內而有月蝕按今以遠鏡窺之光逆之處
影朦朧然月之輪廓仍隱雲衢隱約素光留卻循黃道推
約可辨非全不透光也雲衢隱約素光留卻循黃道推
經緯漫對紅輪卜咎休天文揭要云此時月之色或淡紅
或若舊紅銅然其所以紅者乃日

光透過地氣卽被折分爲七色試釋古人災異說詩成堪若虹而七色惟紅難滅沒故也比畔牢愁

送覺羅劭民大京兆入都時將之官瀋陽

李峴唐華胄劉般漢至親天潢傳世德帝眷屬宗臣執法清三輔宣風慰四民虛懷原若谷庶事切咨詢

語及艱危際忠肝鐵石堅事難多束手恩重獨仔肩方喜

風不變還虞火未然惓惓憂國念三復放翁篇大京兆自書楹帖用

放翁句見贈云養心雖若冰將釋憂國猶虞火未然

至性言無閒庭聞日問安潘輿方就養萊綵爲承歡忠孝能兼盡行藏轉覺難九重隆倚畀未許挂朝冠

濟世心仍切荆闕筆暫拋北門嚴鎖鑰東土擁旌鐃報國瞻移節搜才訟下交賓僚相送處斜日駐寒郊

漆室憂偏積誰憐倚柱吟同仇惟士氣固本在民心公若

持釣軸人思慨金鬻芻蕘宏采納爰敢貢丹忱

丁香花四絕句 己亥

餘寒料峭襲羅裳槐未含青柳乍黃眞箇司花先奉敕春風占斷一庭香

粉身墮麝杜陵句鬪影蟠虬錢起詩情緒雨般花一樣不關臭味有參池

亭炁獨生標異號卻看千萬結同心叢芳未入羣芳譜藥籠還從本草尋

王象晉羣芳譜未見丁香之名廣羣芳譜從本草增入藥類

爭說憫忠花萬樹步尋古寺曉風前

京師闕忠寺丁香最盛

閒思往事增惆悵不到宣南又七年

籠中鳥

深鎖雕籠傍繡幃主人情重許相依何如脫卻金羈去海闊天空任意飛

重到京師

幾日霜風速我行
西山爽氣若相迎
江湖更作觚棱夢
尊酒重修主客盟
燕覓故巢偏冷落
馬尋熟路尙分明
者回未聽玲瓏曲
疇與殷勤唱渭城

病中戲題

生平不作維摩病
今日官衙閉閣眠
孰念勞人情草草
漫啗睡漢腹便便
暫疏期會間非惡
因病得閒殊不惡
東坡句更逐風塵
健卽仙檢點千金
方一卷庭梁休賦
照鄰篇

病中鄉思頗切率成七言十絕句寄示雲抱

病肺嘗吟工部句
養身未熟長桑書
官齋擁被難成夢
卻憶青山有敝廬

夕陽影上驛西橋
如許風光拍手招
春水鱗鱗山靨靨
還從慘綠數芳韶

樓上看山寒撲面雙菰溪上是吾家芒鞋重踏溪山路第一先嘗紫筍茶

關心妙喜山中竹莫笑清貧太守饑可是無田歸亦得爲他苦筍脫朝衫

老桂先公親手植

庭桂爲觀察公手植

欣欣生意早秋天木犀香至

曾聞否好與同參五味禪

靜裏聽松見道心小軒還是讀書林舊圍解帶誰量得歷

盡冬春雨雪侵

庭中羅漢松百年物也

龍驚巧仿龍皮扇搏蟹輕搖鴨嘴船攜得芷畦殘帙在好

將土物續遺編

牢落人生五百年摩挲銅狄意悽然鐙前苦憶東坡句風

雨匡牀久獨眠

東坡和子由詩五百年間誰復在會看銅狄兩客嗟時子由固尙在也余諸弟皆亡

矣誦東坡詩不忍卒讀

手澤書存盟露披禮堂審定復何時阿咸念汝多辛苦黃
卷青銓夜課遲

午枕暫拋書帙亂丁簾不卷藥鑪香欲知鄉思今多少夢
繞龍山閣水旁

詠物八首

乘炎消黑白遽集誚中書一夕寒飈至天教盡掃除

蠅

紛紛飛似霧擾擾聚成雷利嘴秋毫銳中宵嘔血來

蚊

慣向禪中匿爬搔速具湯若教蕃息後莫怪念阿房

蝨

么麼跳偏捷搜尋計轉疏丹鴻能殺汝那得使蟾蜍

蚤

蝨尾共驩比能隨主簿南勉思商鼎語止毒意須參

蠍

青桐談叱叱十幅獲琅玕世界三千閭偏從故紙鑽

蠹

慎毋嗤跛鼃漫詡制騰蛇曷勿回頭顧池塘正吠鼃

蜈蚣

緝緝如蝨化潛形敗壁中噬人甚重蠻還臭爾何工

蜚蠊

邵子湘種橘圖序東坡云吾性好種植能手自接果
尤好栽橘陽羨在洞庭上柑橘至易得欲買一小
園種三百本屈原作橘頌吾園若成當作亭以楚
頌名之然東坡園與亭竟未就也龔子節孫移居
陽羨仿此繪圖乞名詩詞盈帙龔名勝王
宜興人余感其
事成二絕句

誰能彈指成樓閣韻事空聞說大蘇我亦欲從農圃後
看一幅節孫圖

也題楚頌結茅亭何日扁舟下洞庭乞得東坡三百本滿
園風露挹奇馨

偶然作十首

秦皇舉六合寫放諸侯宮阿房築咸陽屬之雍門東營建
正亟亟壁遺山鬼逢二世萌侈秦欲竟先人功廣集驪山

徒督責猶未終項王西入關一炬光熊熊土木與兵戈天
人潛相通茅茨土階上帝德何其崇

銜泥葺香巢春風傍閨閣雙棲瑋梁穩時聞絮語樂暫離
王謝堂四顧費營度烏衣國杳渺性命寄一幕庸庸孰苟
安謂此亦不惡狂飈詰朝起幕傾巢安託微物覺幾先傳
侶早商略舊巢勤補苴陰雨免飄泊

窮巖搜巨材經營萬古宅門戶規千重梁棟構百尺方其
卜築始輪奐計朝夕蠶楨必丹雘階阼亦金璧工師不勝
任瞠視但跼蹐倂短而改錯道謀終無益寄言考室者先
貴求匠石

蛇醫一寸腹銜冰竟吐雹蠡蠹尾眇小辛螫亦有毒慎毋
輕細微巨害每潛伏常流見若咫悠忽無遠目所貴防未
然先幾哲人燭

水油不相入水沈油則浮水泥易相合水渾泥必稠莫惡
水上油油去水可留莫患水中泥泥澄水仍濁不澄亦不
去穢濁終爲憂靜言驗物性毋忽泥與油

張湯性陰鷙鼠磔任智數郅都稱公廉鷹搏少平恕漢初
敦樸風陵替世不悟我讀酷吏傳終篇見深慮網漏吞舟
魚古人示大度治道縱劫持誰能禁怨怒

溫公議雇役不取子瞻說魏公刺陝軍文正論徒切方其
奮獨斷羣言所不屑利去害獨存嶠然悔滅裂永終能知
敝韋編孰三絕

昔聞賣餅師天懷本清曠腹果閉門臥笛聲發高唱鄰有
陽翟賈叩門來相訪深心付重寄千金啟寶藏自此勤鉤
稽籌算構意匠笛聲更不聞營營走俗狀清夜矍然悟敬
謝主人貺歸來甘窮餓四壁物無長賣餅多餘暉笛聲復

悠颺陋巷何蕭條吾真幸未喪

事見宋人小說惜不傳其姓氏

黃鳥何繙蠻邸隅乃知止雌雉鳴山梁翔集審於始天空
任來往從容脫塵滓時哉得大化靜觀悟物理

桂樹從南來植之於西園經秋藥皎潔入春枝披翻縱逐

候榮悴不受人寒暄

北方諸盆花可以暖室窖藏明年花樹不敗獨桂花不能如舊說見香祖

筆記高柯本離俗勿共凡庸論

湯貞愍公日下連枝圖

錫三家藏出以相示

聯翩同踏長安道家世東甌舊有聲太史綠章應夜奏賢
人聚處德星明

石欄竹柵多商意老樹蕭森別墅開八顧三君歸一姓客
中同進十千杯

祕籍金湯十二籌髻年把卷讀從頭翻教書畫聲名掩幃
幄還多未竟猷

千秋碧血灑蒼弘豎子無謀涕泗橫太息神州沈浩劫江
流遺恨正難平

摩挲大樹感飄零忠節長留汗簡青此日披圖增想像君
家寶守重儀型

太平阮緝軒明經

敬熙

同年馥雲農部之封翁也徇

粵寇之難附祀忠義祠馥雲來徵詩敬題六韻

倉猝民兵集方謀保一鄉毀家荆令尹助費漢中郎白旌
軍初合紅巾馘日張蝟毛嗟正起螳臂恨難當慷慨情詞
壯從容節義彰九原心克慰祠祀永流芳

花朝度蘆溝橋

庚子

北風獵獵卷旌旂千尺長虹跨上游驚蟄已過寒更重斷
冰萬疊擁蘆溝

稿十終

枕碧樓偶存稿卷十一

詩五

詠史三首 庚子七月

秋來樹樹起西風慘淡浮雲蔽碧空
晉惠有心除慶鄭本初無面見田豐
可憐碧血沈荒野誰識丹忱達昊穹
狐鼠升堂鶚毀室玉河橋畔恨河窮

雲泉相勸早抽身塵海原多未了因
弘景挂冠何灑落之奇盡呈不遑巡
心縈北闕花原好夢逐東山草自春
偏是有田歸不得鶯湖煙雨羨垂綸

枉教國手理殘枰日下妖氛未易平
親貴豈真忘大義興人畢竟有公評
和戎初不關洪皓遊說何曾作宋慳
儻與舊交逢地下一般心事未分明

九月初一日口占

楚囚相對集新亭行酒三觴涕淚零
滿目山河今更異不

堪說興晉人聽

重九漫題四絕句

老去悲秋憐杜老，銜杯強說客懷寬。
非關風力能吹帽，更倩何人爲整冠。

書是日所見

算到籬東菊正芳，白衣送酒爲誰忙。
愛吟陶令閒居句，塵爵虛纍恥未忘。

千林落葉戰聲塵，鐵甲金戈氣正囂。
酹酹難酬佳節好，竝無風雨罷登高。

朱竹垞有惟嫌重九會風雨罷登高句

高歌坡老醉蓬萊，華髮蕭蕭百念灰。
休說雪堂能爛醉，今朝誰倒接羅來。

漫題三首

不少旁人說短長，事逢束手費思量。
乘軒老鶴騎難穩，覆盎醯醢舞正狂。
方道和親憑魏絳，孰教幽憤泣嵇康。
可憐

魯國奇男子難救江東盛孝章

嗟哉百姓盡征恫空說年登比戶封難得莊生開口笑偏
教鄭伯降心從煙塵到處都成劫尊俎何人可折衝豈少
犢師牛十二弦高詞令枉從容

趨蹌未改漢官儀簪組權拋反覺宜得鹿亡羊悲客夢嘲
鳩嚇鼠笑兒嬉偏多酒禁街頭帖絕少車聲陌上馳葦管
鼃煤書怪事幾番咄咄獨嗟咨

平陵東 十五日

平陵東十丈蓬誰教收劫義公金汝金鼓汝鼓縛義公田
交午力士短衣頭雉毛千騎萬騎陳東郊人言義公不可
贖我言義公如可贖東家輸金錢西家賣布穀

移居二首 十九日

徒言玉敦與珠盤誰使崑崙困火官了事偏多新吏牘下

居仍著舊儒冠窮猿乍得投林喜疲馬還思稅鞅安算是
今宵魂夢穩何須苦語勸加餐

支頤欹枕數殘更早作家書付驛程檢點衣裘逃楚炬評
量書卷漏秦阮拈毫乍試長眉硯煨粥嘗支折腳鎗閉戶
但尋今夜夢去來莫再問三生

閒居五首

坦然心地自安舒陋巷何妨寂寞居行藥每搜元化笈問
奇偶駐子雲車飈飈不禁跳空案犬散難教寄遠書羨爾
冥鴻都自在歸期先及早霜初
簿書乍喜掃無遺詩卷攜來獨自披坐穩氈無缺上苦飯
香炊豈劍頭危風嚴偏覺燈光斂月定頻看樹影移贏得
者般閒意味逍遙自在莫相疑

堂堂歲月似奔輪落落風期自守真鬱鬱山松終耐冷離

離澗草必逢春常將亶亶深深意同踏膠膠擾擾塵眾口
悠悠烏足計此中綽綽匪無因

老聃名論豈眞忘舌以柔存齒折剛心苟能空同止水腹
緣善忍若懸囊顛危總賴扶持力煩惱須尋自在方惟雨
別風來不測中流容與有慈航

風塵憧擾苦相從何術能消戚戚悰束縛倘逃顏跼網優
游好逯尙禽蹤歸來擬卜三間屋覺後常聽半夜鐘帆力
馬蹄都悟徹豈將浮利芥心胸

十月十四日夜雪感賦二律用東坡雪後北臺壁韻
寒聲鼓柝雜洪纖愁坐危城氣倍嚴甲斨王龍沈斷水旗
描白虎肖形鹽中宵舞勢常穿戶破曉晴光乍到簷試踏
營門尋故壘牆頭半露鐵矛尖

畢逋不見滿林鴉古道誰驅犇笨車晝閣無人評柳絮斷

橋何處訪梅花
衡茅雲臥多爲客
隴麥煙封半有家
衰老爭禁寒徹骨
蒼茫獨立手頻叉

冬至三絕句

十一月初一日

寂寞門庭短景催
還將氣候驗葭灰
休驚子美形容老
江上年年作客來

遂良鬚鬢竟成絲
緩帶深衣閉戶時
回首觚棱空想像
誰將冠佩問朝儀

喜占卦氣一陽開
人事天時且漫猜
惟有眼前風景換
將舒岸柳放山梅

十一日戲題二絕句

是日爲西園元旦

名刺驚疑下九天
一般大字寫紅箋
非關海外人情異
元日紛紛重拜年

休言願朔出天方
不奉三正繼百王
破曉營中齊奏樂
短

衣按劍起行觴

十二日夜大雪率成長篇倣歐陽永叔聚星堂禁體

卽川其韻

禁用玉月梨梅練絮
白舞鶯鶴銀等字

黃昏欲雪未成萼早眠但覺衾裯薄關門忽聽風力粗打
瓦乍兼雨聲作須臾負勢騰虛空歷亂橫飛下清廓城頭
寒鼓溼欲瘠窗間故紙光正爍曉起推戶氣混茫千樹萬
樹吹還落此時城中息囂氛古今同聚一邱貉虎迹滿地
難掃除龍甲半天可驚慢廐倒不聞喧櫪馬倉空詎見忍
陳雀踞涼莫憐東郭履隱淪共躡居士屨千畦種麥情固
慰一杯把酒意誰樂安得化作天河水宇內兵塵盡淪淪
東來海鳥匿光采西去沙蟲返荒漠且喜處處沒畦町共
勸家家賣刀槩兆占三白歌豐年比戶可封乃歡噉

十三日暮復雪仍倣前體用東坡韻

樹頂紛飛若落葉奚奴縛帚方掃雪天公有意益霖霖頓
覺街頭足音絕長松張鱗真欲飛老檜埋腰不肯折
酒鎗寒氣旋凝烹茶薪涇火半滅作詩拈韻肩常聳題字呵
毫肘應掣老夫心閒無所營閉戶垂簾添衣纈高吟歐蘇
句清妙正似罪罪王成屑回看飛翼入窗戶几硯點點乍
飄瞥靜中自可得佳趣此境無須向人說夜探憶及歸去
來征途碎碾輪蹄鐵

十四日晴率成一絕

門外雪深過一尺寒封村路沒平田間聽父老從頭數無
此瓊巽十五年

有自都下來說近事者率賦一絕

柴市從容成素志孤忠終不愧宗臣
春明消息傳來異道有從旁下石人

雜詩十首

落落廡下客力役爲人春早晚妻具食舉棗何其恭主人
出視客識爲非凡傭延之於座上舍之於家中星輝少微
殞壽命一旦終馬鬣傍要離烈士俾相從塵壻具隻眼宇
內洵難逢奈何百世下無人稱伯通

月出眾山小乃言不勝火炯炯燭天地幽深遺細瑣薪傳
燄無盡脂魄光常墮將謂月勝平誰歟爲祖左持火置月
中燭息當印可

連乾錦障泥介馬臨流馳臨流馬不渡此意誰能知武子
識馬性馬癡人更癡人癡乃成癖馬癡君莫嗤物力當愛
惜奢靡此良規主人眞解事世方相以皮

矯矯童子鴻自昔勵高節食力無忤容志不因人熱齷齪
固足羞依附更不屑兀冪崖岸峻百禩仰風烈獨念同舍

人風塵共蹙蹙炊已呼之炊其意非輕蔑釜熱炊相仍未
邊儕驚劣滅竈而後然無乃太決絕君子居斯世過剛者
常折睚眦易成讎機值每發洩細故招巨患保身愧明哲
行危言則孫中庸聖人轍

昔者池仲魚家倚城門居亦自欣有託豈知有他虞鬱攸
一旦至嚙出聞呌呼乃鑒焚蕩後遂咎經營初世患越意
料何處非險途君子卜仁里但期龜兆孚畏首復畏尾此
身將安趨

彥回藏鯁魚萬錢中心鄙微之批龍鱗敢言爭國是會之
用眾議列狀存趙氏介溪隱山中卅年誦經史方其初念
明亦思剛君子如何轉念差貪榮遂忘恥淡泊心乃空清
涼國可止彼哉熱中人營營正無已

吾思趙侍中赫赫勳業盛建隆乾德間十年執國柄頗同

甯喜專有殊子產敬一朝讒慝生河陽遂遠近左右爭相
傾跬步皆坎穽造膝能解紛長者呂餘慶

趙玘害忠獻忠獻獨援手多遜譖文正文正爲分割故無
失其故用意良亦厚柰何從政者禍隘若簣斗下石或無
心騰謗且攻培伯仁由我死冥冥負良友

潭潭宰相居上謁聞不通昂昂姚判官一怒髮上衝謝之
終不顧從此遂絕蹤頓觸宰相怒陽示推轂公因事陷之
死歐刀撾霜鋒遺骸不得收投之洪流中相讎胡太酷睚
眦竟不容眞道多忤俗側媚能全躬所以高尚者冥冥羨
飛鴻

明道請廂兵力塞曹村掃茂叔知南昌黠惡盡向道子靜
城荆門次邊息驚擾元晦振台郡四野無餓槁經世具體
用大儒展襟抱豈如地畫餅空名逞文藻亦非談良知此

心墮虛鼎撼樹汝蚍蜉狂言肆輕狡

書東坡朱亥墓詩後卽用其韻

侯生隱夷門高風渺難追巨眼識屠者矯矯眞健兒晉鄙持兩端椎之俾臭遺趙存魏亦安英名盛當時私恩與大義權衡誰得知豈同盜齊豹史筆裁宣尼

識語有江山問老叟之句傳之數年矣戲題六言三首

豈是商山四皓定非淮上八公揚鷹西方尙父垂象南極老翁

容顏方瞳綠髮服食鍾李綏桃絳縣尊爲國老青城名在仙曹

不信挾山超海要知旋乾轉坤奧旨已通月窟神機可探天根

山陰酒二甕藏弄七年矣今夏以一甕餉客其一甕
竟爲海外兇螫所竊戲題二絕

平生酒戶欠三蕉常把空杯對月招留得七年佳釀在胸
中壘塊可能澆

今年銷夏曾供客劇勝東坡一甕雲不分者邊尋吏部番
教醉殺火頭軍

十二月一日夜雪用東坡江上值雪傲歐陽體韻

原序

不以鹽玉鶴鷺絮蝶飛舞之類爲比仍不使皓白
潔素等字與聚星堂原序禁用玉月梨梅練絮白
舞鷺鶴銀等字微有不同

寒藏宜學服息龜黃昏叢集人未知破牀布衾踏欲裂列
營畫角噤難吹不問門外雪疎密但覺冷氣侵吟髭曉起
披衣抱膝坐已見窗紙含冰嘶巡簷四望負手立庭樹收
頂屋露危日光離離照斷纈風力屑屑飄輕絲此身彷彿

出塵海光明世界非人爲前雪未銷後雪并惟天陰隲有
主持兵戈擾擾眾塗炭醫瘡剝肉刀刻肌長安空說臥高
士下蔡何曾走健兒天子肝食裘不御宰相梁色心憂時
謀臣呵筆草軍檄邊卒被甲居瓊幃黃童白叟苦蕩析足
僵皮脫無人姿彼蒼鑒觀信不爽禍由末俗超澆漓故教
優渥且霑足嘉祥入告陳丹墀來歲麥熟定可卜千村萬
落青離板旣富方穀民志變螭魅屏迹夔魑馳默窺此意
差足喜鄰翁勸進酒一卮詞人例上瑞雪頌我願操管相
追隨孤吟忍凍所弗卹微火炙視終賦之

十六日立春

殘年金已斂今日木稱王星士言推驗從茲馬最良

二十六日保定曉發

危城厭聽戍樓刁畫旆悠悠曉色招指點抱陽山遠近重

教蒼翠看今朝

春歸十日寒猶重一路垂楊未挂絲檢點畫梅交七九

是日

爲七九第一日河邊漸已見流澌

過望都縣憶東坡詠劉醜厮事口占一絕

崎嶇雪裏暮雲愁寸刃能梟二客頭終古此齟齬名不朽好憑詩筆發潛幽

定州四首

太行千里翠雲翻送我西來上古原了了炊煙飛不斷東風吹入劫餘村

土門關勢接層城相像當年細柳營戰壘飛馳何國騎平沙浩浩陣雲橫

畫石爭傳雪浪奇高齋燕沒繫人思坡公昔作邊城帥十萬旌旗變色時

岩堯塔影插天青
鈴語劬當不忍聽
戰馬悲鳴烏鳥絕
夕陽殘戍幾人經

祁州與潘文溥大令

江夜話

荒城逢舊雨相與話滄桑
浩劫生螭魅強鄰盡虎狼
讖詞徵古碣燐火滿積牆
此邑真多幸閭閻覩小康

停車三歎息重見漢官儀
吏卒喧排仗民兵笑擁旗
方簪清伏莽河術起瘡痍
痛定應思痛須尋國手醫

深澤縣重度滹沱河

昔者王將軍詭言冰已合
我今渡滹沱冰與雪叢沓
瘦馬策凌兢危橋倏騰踏
回首舊日遊正定程相接
驅車亂流渡春光翠浪疊
慘綠少年時積波一交曉

除夕宿內邱縣

今夕歲除還作客
蕭條旅舍內邱城
汴河算計程多少
一

蓋唇蘇獨自傾

萬千鎔火照山城

自柏鄉至此沿途村舍北戶懸鎔城內亦戶然一鎔紅綠皆備殆風俗然也

半夜喧傳爆竹聲一樣東風春意透那堪客裏聽分明

豫讓橋

在邢臺縣北三里許

會聞厲叔報敖公貽上詩篇在勵忠烈士甘爲知己死此心不與眾人同

元旦過順德府王次康大令

錫光

留宿於此

辛丑

故人相見驚雙鬢容易霜華又一年作客偏教逢此日不歸還說爲無田飛鴻到處來留爪疲馬長途漫著鞭幸是王喬鳧舄駐一尊柏酒助吟箋

晚宿邯鄲縣重題盧生祠

剎那四十春又向邯鄲過我固非至人無夢高枕臥

度漳河宿豐樂鎮

勤王之師駐此

東風相迂過漳河列岸旌旗壁壘多
閒殺將軍珠勒馬夕陽荒草飲長波

魏家營旅壁有疑冢長歌意是而詞未雅約之爲二小詩

慘設摸金諸校尉夜深故鬼哭秋墳老瞞未死心先悸
此句疑冢纍纍鎖夕雲

曾聞朽骨出漳濱國初事斧鉞難逃死後身自有千秋公道
在漢家陵墓列明禋

鄉村新年詞

張燈絕似元宵景人語雞聲聚一邱
短杙亂糊紅綠紙家家斜挂樹梢頭

村前老媪競攜籃來往鄰家伴兩三
莫解新年相餉意未遑問俗一停驂

村婆齊插滿頭花
挈女攜兒笑語譁
鄰舍不遙三五里
雙牛穩駕賀年車

自成腔調
壯童忙鉦鼓喧闐
打麥場識得中含豐樂意
不聽畫角奏悲涼

過湯陰縣懷岳忠武

嗟昔宋中葉
厲階生童蔡禍始
貪燕雲孰過女真騎
康王渡江來
崎嶇踐天位
初乃任汪黃
繼更倚賊檜
徒令諸將佐披堅
忘敵愾
桓桓岳少保
後起監眾帥
鄆城一戰勝
烏珠欲引避
太息金牌召
十年功竟弃
痛飲黃龍府
此志傷不遂
異哉瓊山老
持論何憤憤
謂檜實存宋
謂飛功難冀
曷勿度其時
南北利與害
湘湖諸盜平
內患已盡去
諸將百戰餘
頗各擅才智
韓劉楊沂中
淮海號鷹擊
興元久開府
璘時繼兄玠
背鬼臨中原
響應河內外
太行結民社
慷慨

慨多忠義金主方偷安不復圖開地國內諸宗王乖離心
攜貳海上諸舊將先後皆弃世所存獨烏珠西挫東亦憊
列城半焚盪曹司昧政治僉軍更驛騷閭閻久怨懟所以
豪傑士爭欲及鋒試儻用忠武謀規略布遠勢大軍取兩
京壺漿父老至烏珠雖梟雄久持必內潰一軍出秦鳳關
陝士凌厲一軍出淮右齊魯爭來會諸將苟一心恢復反
手易何爲失事機竟用畫淮計永絕中原心一髮安可繫
吾知檜再相曲伺帝私意造膝進蜚言獨力主和議飛死
構稱臣檜亦不可制從此成偏安祖業慟淪替僑不曉
事口舌毋輕肆故里修明禋祠樹鬱幽蒼精忠抱遺恨瀟
筆還揮涕

到大梁

日日望行人行人久不至既至翻驚疑還恐是夢寐骨肉

散復聚坐定心轉悸離蹤說不盡約略說三四囊空且毋
憂身幸免罪累今宵旅魂安忘此亦異地

二月初五日發大梁祥符道中口占

長河東下挾沙旋橫掃肥田變瘠田爭道先朝恩澤厚此
鄉人免正供錢

中牟縣

魯君異政不能忘百里謳歌百世芳積弱要須勤內治于
今疇是漢循良

中牟曉發

城西十里展征旂遠色含春晝裏收綠意漸濃沙氣薄垂
楊如翦麥如油

將至鄭州

雲引塔光延口腳風吹城影汨沙頭兒童暗向征人笑指

點前邊是鄭州

子產祠 在鄭州

公孫遺愛聖門推論學原須并論才國小鄴強交有道此人端爲救時來

豫境州縣道旁多德政碑連日行弇中此碑尤多爲賦一絕

果然去後繫人思奚事張皇道左碑轉眼磨礪爲柱礎我嘗三復樂天詩

滎陽縣贈同鄉趙偉卿大令 景彬

尊前舊事話燕山十五年前記識顏道我鄉音還未改蒼蒼贏得鬢毛斑

自笑半生常作客眼前得見故鄉人故鄉風物煩君說卻又恩恩說不真

道旁碑有懿行教思諸名蓋爲鄉人立者

鋪張行誼勒貞珉宅里芳徽表式真若少愧詞同有道勝
將德政誑斯民

山行口占

梨花斜出半山腰不受塵埃態自饒雪白滿林紅碧間杏
方含萼柳垂條

山田沙磴自高低曉色含煙麥影齊獨得靈泉資灌溉千

層瀉綠恍如梯

張船山詩正憶往時冬
水足山田層累望如梯

老犍坡

記水縣坡西卽
古之虎牢關也

關勢臨厓巖地阨周鄭垂自古稱至險客子愁攀躋巉巖
梗頑石屈曲穿危厓陁中不竝軌相逢兩難移心憊百折
經目駭千尺谿回旋輻常脫犂确輪易摧往者官吏勤以
時來平治年深日圯敗行李胥嗟咨昨歲亟轉輸悉索烏

容遲羽檄迫星火輶輻向豐岐途長越險阻期迫多愆違
大官發巨帑畚鍤經營之湫隘盡攘闢傾仄就平夷我登
鳳翅嶺告戒車毋馳我僕喜僥倖我馬忘虺隤參井不可
捫但覺雲氣低振衣左右顧壯觀隘四維長河環其北洛
水帶於西東瞻小溱洧南望隔淮淝晉楚戍全沒項劉壘
久墮古今論成敗不能計是非茫茫百感集心顏奚由開
山花秀爭發隄柳青含穉攬茲仲春景聊用伸愁眉

武虛谷墓

在偃師縣東十里許

虛谷才名海內知一官下邑已驚時饒他緹騎鴟張甚難
免先生盡法筭

偃師縣道中

雙了幼女也攜鋤勤儉家風近古初井畔軋鴉聲不斷隻
輪盤轉引清渠

曲沃鎮道中用熙韻

岡勢坡陀澗底平山雲低逐馬蹄生不堪官柳春光動宛似依依送我行

登高四望恨無窮三晉雲山在眼中過河即山西界聞道紫荊關下路豺狼滿地未能通

老子傳經處用熙韻

在靈寶縣西關下

神龍變化原難測西去流沙記所經不向素王參筆削卻逢令尹候林垌史家合傳儕非害柱下遺編擬日星欲覓仙蹤竟何處織烏飛逝不容停

閿鄉道中風沙大作用熙韻

是日十四日後聞開封一帶又風霾一次

飛廉赫怒自西來石走林摧響若隕擊面馬驚沙雨舞昂頭人上亂雲堆籌量萬斛空惆悵路擁三叉強糊徊昨嚴方經塵劫過柰何拂拭又多回

潼關

身行萬里半天下可蘇子半愁總寄詩今我入秦方發軔
故園息影在何時

華陰道中

新陰夾道綠成行宿麥含風浪影涼一路沙磧平似砥引
人山色總青蒼

西安八仙菴牡丹最盛二月三十日雪堂同人召飲
感賦長句呈何公僧郎中

名都形勢天下最此意蕭條已千載翠華西巡修舊儀車
騎聯翩四方會我亦迷職來自東天顏咫尺朝離宮僕痛
馬瘡暫憩息湫隘不妨居市中白雲舊侶扈聖至告我春
深討花事城東精藍劇幽勝相約攜尊到初地一犁好雨
黃塵捐花枝濯濯臨風前靸紅魏紫發奇彩孤叢縹碧尤

爭妍花下共酌羔兒酒花光羞對霜髯叟休教攀折殺風

景是日有折花歸者

今年春事不辜負酒酣回憶春明坊左司傑

直同倚裳清時雅集獲酬唱觀荷賞菊攜詩囊君每摘毫
挾天藻徐陵格調最清老我常把筆隨吟壇好憑韻語寄
懷抱彈指光陰逾十霜故人各在天一方異國與君重把
臂翦鐙促膝談滄桑滄桑感喟不可說今日尊前話風月
苦無李吳金鳳箋妙句與花寫仙質

八仙菴羣卉甚繁不獨牡丹也爲賦五短句

壓枝千萬朵細彩耀繁星勿怪中含刺教他俗手停

黃刺藤

敢自矜標格當門總被鋤何如空谷裏清夢得蘊蘊

蘭

靚妝都首識卻恨我來遲賸有殘枝在東風好護持

海棠

當階翻素影露裏蕾初含切莫嫌遲暮未過三月三

芍藥

不知經幾閏歷劫自能全雨後含蔥翠團樂密蔭圓

剪院黃楊

二作百
年物也

偶集東坡句

時將
上已

干戈萬槩擁篲離弱羽巢林在一枝白髮蒼顏誰肯記行
歌野哭兩堪悲流觴曲水無多日罨畫溪山指後期倒著
接離搔白首那堪重作看花詩

大元村哭天水尙書

海內論知心知心能有幾與君交素淡公庭接冠履沈埋
簿書中詎遑計譽毀君獨語同僚推許多溢美五馬去濠
州鵬翮程三徙述職來春明歡言酌芳醴泊余守南海金
閨列戟檠雲泥分離隔尺素通迢遞朝命總秋曹執法少
偏倚進賢陳密勿旁采及葑菲聞我考績來相迎乃倒屣
舊侶偏評隲陽秋有臧否用法寓慈祥設我識此目一面
成永訣耿耿情何已妖氛起畿甸張皇到山鬼親貴詫奇

術假以雪吾恥君獨知其非密陳不可恃孤憤尼眾咻憤
椒勢難止西狩遂入秦流離歎瑣尾羣雄益鴟張移檄究
禍始始禍眾親貴誤國魄應殲君乃罹此難繫鈴鈴誰解
入覲咸陽城出城訪君里驅車渡灃橋長虹跨波起其長
丈廿四工鉅君所庀行人免徒涉利濟頌桑梓入村問君
屋方與役又罷古寺一撫棺萑蘭頻揮涕聲歎眷疇昔浩
落固如在萬恨何時平干齡終已矣拭淚強回轍就卓還
噓唏言之愧不文奮筆疇爲誅

五月二十八日西安晨發

終南山翠上征鞍雨後煙光畫裏看劉項興亡都不管西
風送我出長安

是晨西風

度灃橋

王魚洋秦蜀驛程後記云三月初七日雨過灃橋交岸楊柳視昔已減什九賦一詩志感

據此則拂之零落久矣

又策疲驂過灞橋

今春過此

羈人到此總魂銷無情柳亦悲零

落非復當年綠萬條

靈寶道中

葛衣時候著棉衣翦翦涼生暑氣微一路馬蹄塵不起滿山開放野花肥

龍亭

在開封城中地勢極高相傳爲北宋時宮闕舊址後殿有雕龍石臺高六七十尺許言尙是宋時

御座

玉座幽房閤殘僧日索錢春明何處是猶說靖康年

九月二十日發大梁至柳園無船不得渡河宿河上

官店二十三日始渡河

桑下經三宿蘆中孰再呼上軍先具未留守壯情無才拙逢津吏詞嚴檄彼都布帆安穩渡破冢不須虞

道旁野花紫豔雪後彌茂俗呼野菊花

寒重花逾豔臨風瘦自禁不須譏小草獨具傲霜心

築道行

省符昨下郡剋日起周道列郡檄州縣州縣責鄉保挨戶
齊民夫興築趁晴杲上戶多家傭弱戶寡壯佼畚畚走童
稚藁裡累翁媪赴功不言疲忍飢豈得飽九重方旰食何
況在臣旱科斂苟可免遲敢惜力小所幸風日和秋深霜
露少千里成夷塗經營莫草草天子奉慈輿西巡歸路好
聖仁重節儉供億戒苛嫵常念民力艱惻痼總在抱綸綽
頒四方窮簷盡喻曉惟茲土功繁差雇議紛擾舉事策羣
力鳩工賴億兆豈欲煩吾民吾民已枯槁萬寶方告成滌
場農事了我聽輿人誦正言喻耆老努力勿懈怠皇恩正
浩浩

正定府舊有行宮爲乾隆前西巡五臺駐蹕之所新

城紫泉書院亦其一也

聞道離宮接紫泉翠華西幸盛從前
低回曩日深殿地彈指滄桑一百年

清風店

昔年歌館接紅牙今日蕭條白板斜
雛女也知家國恨閉門不復弄琵琶

方順橋阻雪遇張春圃副戎

泰話舊

抱陽山色近大雪阻郵程疲馬嘶還壯
寒鴉噤不鳴悲涼聽畫角辛苦數殘更
衾衾冷難成寐關心是早晴故將殘營在
牽裾涕泗加當風官燭短卷霧成旗斜
旅客嗟無食遺氓幸有家詰朝征旆展
早旭燦紅霞

十月初十日到京雜詩

磨驢故步迹都陳滿眼偏教百態新
羸馬今朝行得得又

隨人踏軟紅塵

爭道遼東丁令威歸來城郭未全非
銅駝今又摩挲徧覆
森門前臥夕暉

月牆西畔玉河頭不見當年賣酒樓
惟有天街風獵獵依
然吹雪上貂裘

風流豔說聚都官
啜茗題詩感昔年
太息應劉今日盡白
頭
疇與話燈前

枉拋玉几與金牀
鳴玉坊前故第荒
唱到奈何歌一闋行
人猶自怨咸陽

藁街邸舍列東城
五色旗開照日明
南北玉河橋下路短
衣到處荷戈迎

慘扶丹旄慟歸來
寒酹忠魂酒一杯
荒寺孰攜磨鏡具蕭
蕭風助白楊哀

幼隨慈母見恆河轉眼年華六十過回首昔時遊釣地故人零落已無多

入直口占

入衛邊兵列隊齊羽林閒殺禁門西曉籌依舊雞人報不分還來聽鼓鼙

稿十一終

枕碧樓偶存稿卷十二

詩六

藥園秋影圖爲嚴迪莊題

癸卯

披圖已覺太情癡讀到君詞語更悲我亦藥鑪親檢點老
來嬾作悼亡詩

曉過柳浪莊

甲辰

稻畦一路接荷塘破曉來過柳浪莊萬柄紅擎花影重千
條綠瀉水聲涼雲棲高樹蟬鳴遠風送平橋馬足忙剛是
瞳矐朝日上參差樓閣照山光

重遊天甯寺

乙巳重九

不到精藍十四年酒香茶熟記從前重來尙識隨時塔鈴
語劬當聽未全

老樹橫敲根半死穹碑摧斷字多亡惟留荒圃三弓地菊
影伶俚對夕陽

尋秋都喜最高臺
往日登臨野色開
不爲催租人敗興
翻教鳩占鵲巢來

秋芙蓉四首

寒雲漠漠畫堂空
賴有瓊芳便不同
好似芙蓉臨北渚
肯隨桃李嫁東風
自標高格繁華後
能守孤根斂退中
漫說秋英例臞淡
淺紅還愛間深紅

孫何愁苦僅何悲
惱殺西風颭颭吹
獨有沈寥臨水際
還留瀟灑出塵姿
霜華已重偏爭麗
春意方饒不惜遲
正是碧湖風物好
清尊同醉魯公池

千林殘葉下縱橫
晚綠成陰別樣清
君子由來知俟命
芳羣譜以芙蓉爲
幽人畢竟不爭名
菰肥畦北爲鄰里
菊瘦籬東作弟兄
競說仙真同管領
丁家山館石家城

聽殘蟋蟀在西堂
尚有伶俜蝶影颺
獨喜臨風姿綽約
那

甘隨俗態低昂亭亭曉圃迎新旭寂寂秋江戀故鄉也著
緋衣自矜貴肯教頰首拜花王

王幼三同年

錫命

司鐸十年解官歸里道經輦下出

萬全留別詩相示大有張翰蓴鱸之感振觸余懷
率成八絕句以贈行且以志歸田之願不易遂也

丙午

少小論交七井邊

幼隨

先大父寓七井胡同始得與君交

直沽西畔記留連

君選萬全

春明門外重相見彈指光陰又十年

一笑相逢兩白頭故交零落幾人留滄桑往事今難說問

訊東橋舊日遊

幼寓勝芳東大橋與君居相近

鬢舍談經講席開飄然解組賦歸來玉壺詩句堪持贈一

片冰心不受埃

安步當車杖不扶高風落落古爲徒翁還矍鑠真堪羨應

君今年七十三

吾學于今世界新普通卒業始爲人小同喜有傳經子裁制還須老斲輪

誦君詩句鑒君心千尺澄潭別緒深悟得朱絃三歎意伊人空谷有知音

不歸都說爲無田愧我蹉跎戀此官何日扁舟江海去年來歷看宦途難

君今從此樂徜徉指點煙波乃故鄉正是榴花好時節大清河上放歸航

送伯剛赴日本 丁未

昨夜占星宿無端值角張使偏誤青鳥劫正換紅羊詩句賡贈玦言贈括囊三山珍重去煙雨放吳航

書高麗破扇

招涼賴爾廿餘年紙斷絲殘忍弃捐破碎山河都不管茫
茫對此感無邊

馮公度 母七十壽詞集易林

關雎淑女柔順利貞夫子悅喜福祿來成 典冊法書思
初道古篤心自守不出房戶 去辛就蓼入和出明禮義
有序終日兢兢 載樂履善論仁讓福姑悅公喜家人雍
睦 羣虎入邑不利出門唯守舊廬乃得全完 擿解患
難神勞志苦以待親知各得其所 囹圄之困不得請求
富於嘉糧食飽無憂 重譯買芝西行求至六藝之門君
子所服 愛子多材秉德無愆文章進仕不若服田 火
中暑退莎雞振羽日利辰良千秋起舞 鳩杖扶老景星
照堂鼓瑟歌舞聽韶行觴 宜家壽母長生无極麟子鳳
雛受福千億

嚴氏家廟松歌

廟在烏程之鹽村

渴蚪攫挐鬚髯怪奮爪天矯碧霄外東西南北屈曲蟠畫
日陰森晦幽蒼捎雲隱月棲仙蹤玄鶴往來起寒籟柯銅
榦鐵異凡卉浩劫將經二百載古松覆蔭嚴家祠封公手
植成脩姿翠黛橫掃勢欲落承以石柱形尤奇曲徑車騎
不可到其上排空如虹霓望氣伯阿定喈曰蔥蔥鬱鬱氣
佳哉支離怪狀莫呼叟喬木原爲故國有梁棟方能支大
厦雨露風霜閱歷久由來人傑皆地靈冥冥鍾毓必非偶
扶持世運生奇材發越多歸蘊結厚披圖恍游茗水東誰
歟畫者今關仝輪囷偃蹇歲長久神靈呵護空山中高會
矩矱世能守孤標勁節咸欽崇木祥感召有至理盛事媲
美鄱陽洪

日本二村嘯庵前年冬書來索詩未寄兩次書來相

促依元韻答之 戊申

海上魚書迢遞至新詩展卷幾回看遙知圓嶠方壺際松
柏青青耐歲寒

怱怱忽過兩年春逝景頻催白髮新我與梅花清一樣世
人漫笑在官貧

九月游農事試驗場絕句二十首

秦時宮室寫諸侯六國規模一例收新起華林營別殿流
丹鑿翠勝西歐

三月條桑七月瓜豳風雨字錫名嘉要知稼穡艱難意不

是宸游玩物華

用右丞句

觀荷曾上水邊亭敗葉蕭蕭尙滿汀欲覓秋聲何處是儘
教留向雨中聽

歷盡滄桑復出山摩挲猶認薜花斑金獅漫作銅駝歎荆

棘榛榛幸已刪

族葵通道已尋常
狼鹿偕來笑穆王
太史重編朝貢錄
而今遺物盡梯航

豫璫豈作羊公鶴
矯首長鳴自不禁
爭食肯同雞鶩伍
高騫還有九霄心

鱣魚低首居盆盎
毒矢強弓盡可捐
爭說冥頑都感化
不須更誦退之篇

嬰母來從西海濱
斑斕五色善迎人
多因未學中華語
閒坐鵬籠說不真

異花滿屋不知名
曲曲筍連煥意生
等是三山間草木
卻來京國競爭榮

徙倚東籬菊未開
三弓地闢雁初來
西風正緊紅逾豔
也傲秋霜竟不摧

幽蘭幾朵苞初放便覺香來分外清何若仍歸空谷去讓
他羣豔鬪繁英

桂花零落逐風飄秋後夫容態正饒占得三分春意足滿
園難比海棠嬌

魏編要術賈思勰漢教田功記勝之流派原多今絕響卻
從東海聘農師

衍出西方學說多近來種植亦分科天全性得眞名理子
厚曾傳郭橐駝

眞定好梨臨武荔蒲陶遠亦自莎車新嘗西國頻婆果香
味評來總不如

好將土化教虞衡麋鹿狍狐子細評今歲滌場時節早尙
餘寒菜綠縱橫

亞字闌干已字樓秋光送我過橋頭今年腰腳輸人健小

坐閒評茗一甌

莫怪科頭笑倚闌
秋容淡處畫來難
那愁吹落參軍帽
翦

翦風輕未覺寒
卻無霜氣侵游屐
但覺花香上客衣
五色離披濃夾道
徘徊好趁夕陽歸

暫拋簪組強登高
老去尋秋步不勞
佳節莫教閒過卻
右傾芳醞左持螯

復題四絕句

鴻爪重尋舊日痕
廿年前事向誰論
秋光一片仍難畫
古柳高槐綠進門

眼前無復舊樓臺
曲檻長廊付劫灰
還有三篙秋水碧
湯流到此圍來

汀洲無數接橫塘
曲港依然送野航
不見泠泠千个竹
更

無清夢到瀟湘

會從古寺聽晨梵復見秋原起暮雲對此茫茫興百感問誰知有故將軍

朱桂卿七十壽言

己酉

日月蓬萊永山謠進壽臧聲名峴竹騎家世紹桐鄉苜蓿盤興詠芙蓉鏡兆祥救時紆策畫報國揆文章汴水珊瑚貢黔山玉尺量誓神侔義哲愛士頌名場甲舍書連屋庚郵硯壓裝五言追漢魏九折軼劉張賜杖歡扶老懸車善退藏微音鴻案肅德澤鯉庭長竹葉新開釀梅花早吐芳延洪齊獻祝稱兕樂躋堂

九月十三日日本伊藤博文被刺于哈爾濱感賦四

絕句

右顧三韓左滿洲欲將長白作孤邱伊藤言我死必指揮

聚米爲山谷大地茫茫掌握收

何來妙手是空空卻笑荆卿術未工如此英雄如此死淒涼一曲薤歌中

西風獵獵送歸旌三島齊聞太息聲不轉江流遺恨在未將奇略了平生

雄才蓋世今安在泡影曇花總一般自古英豪都不悟但留青史與人看

三月二十九日崇教寺看牡丹四絕句

庚戌

送春纔去又尋芳

前二日立夏

休沐來登選佛場差幸殘年腰

腳健還將霜鬢對花王

畫旛徐展護持難

僧以布爲花作

花好能留幾日看國色

不禁封妬虐伶俜弱影已將殘

綠牡丹一

午氣微蒸滿院香楸花紅閒刺蘼黃風流追溯西來閻詩

老當年各擅場

陳迹重尋廿一年樹陰深處啟芳筵眼前不見同來客惟

有花光一樣妍

庚寅在此公譙賓主十
七人今存者惟余一人

又題

寺藏拙庵和尚青松紅杏圖卷于長數丈
國初諸老題詠甚夥巨觀也今屬他人矣

青松紅杏卷中詩秀水新城競一時眞箇通靈會飛去旁人翻笑虎頭癡

俞虞軒出臥游圖屬題長觸予懷率成八絕句

蘭亭春禊鏡湖秋無限山光取次收如此仙都天許住何須更作少文游

宦轍年年在客中晉陽修竹楚江楓翻教舍卻湖山好難得歸舟繫短篷

吳謙寫出舊家山把酒題詩一解顏萬壑千巖歸眼底昔游都在臥游間

髫年訪客下方橋，曾渡錢塘趁早潮。山色湖光差領略，西
興鐘鼓促征橈。

吾家老屋枕苕谿，谿上煙嵐面面低。何事忍拋山水去，勞
人海久羈縻。

披圖往復誦高吟，客子光陰感不禁。少小游蹤還省識，最
難排遣是歸心。

林泉高臥綺黃僊，聽水看雲得自由。暗裏牽絲誰擺脫，卻
將圖畫寄鄉愁。

何日脫離塵網去，與君同泛五湖船。推篷支枕尋山水，朗
月清風不要錢。

題趙偉卿執扇

題者皆年逾七十以上人

香山九老圖，洛下耆英會。何幸茲其間，揖讓塵壚外。

聞警者唱征人曲，率用其意成短句四首。

妾居在重樓夜夜到邊塞
雞聲夢中來疑是鳴駝隊
深閨動刀尺那識邊庭寒
昨夜西風作征人衣尙單
烽火盼平安神靈祝默佑
憂來結我腸未覺腰支瘦
遠道思綿綿樓頭楊柳綠
邊書前日來還擲金錢卜

族人秉謙母柯恭人壽詞

松柏有本性歲寒歷冰霜
賢母勵貞節節苦名乃彰
吾宗有雋才負笈遠游學
臨歧阿母言言出衷曲自我來
兒家家貧甌有塵不逐時世利
兒父能安貧梁上畫叉錢時
時憂不繼十指寒裂縠縫紉助
貸貲廿九兒父亡總帷風淒淒
常恐傷姑心辛酸背姑啼丈夫志
四方兒今出門去願兒學早成
免我倚閭慮當兒父在時不爲非
分求兒其守厥訓毋貽而翁羞
兒身越千里母言常在耳敢述吾
母德敬以告君子冰清不厭寒
井古不起瀾吾宗有高行合

作貞珉刊未遑親鞠踞登堂酌大斗願申述德詞以爲賢
母壽

七月初三日重游南河泡八絕句

宿雨雲猶漬攜尊出郭來西山清若泚便覺隔塵埃
陳迹重尋處蹉跎十九年荷花依舊好香氣落尊前
尙憶同游侶高吟擊鉢時應劉都已盡誰與共論詩
高亭今不見賸有樹陰圓殘礎餘三兩瓜棚豆架邊
新起輜軒路柴門迹半荒

京張鐵路割去白蓮池十二畝

白頭老翁在絮

語說滄桑

林遠蟬琴曳波平鴨廚浮輕涼添幾許明日是新秋
莫嫌塘偈仄還有數弓留素藕悲零落相貽不自由
村頭荒店遠水際斷查橫惟有門前柳依依管送迎

趙偉卿六十壽言

赫赫華胄挺生英賢流聲若雪畫策幽燕振鱗汲水奮翮
嵩山撫字斯民心切惻痾 鑾輅西歸萬騎千乘大庖
度徒御不驚民均其徭野安其耕乃積乃倉財用斯贏
音化鵬鶚邑靖豺虎民競賣刀士知承矩中牟魯恭朝歌
虞胡漢代循良不朽千古 溫風始至月吉辰良桑梓敬
恭禮隆杖鄉綏桃琳李來薦于堂以引以翼介福稱觴

王劭農七十壽言集易林

溫山松柏其葉將將嘉樂君子爲國寵光 克身整已論
仁議福以待親知九族和睦 抱朴守貞仁義俱存德積
逢時受職蒙恩 篤心自守宣勞就力謀議我資溫仁正
直 冠帶南游君子撫民仁政得道惠而不煩 頌聲並
作民人安息懸輿致仕得歸鄉國 愛子多材德義淵閎
升擢超等入和出明 金齒鐵牙長生无極家宜壽母子

孫千億 辰次降婁日利時良華鑑百枝景星照堂 太
乙置酒樂正起舞諷德誦功福祿來處

六月二十八日南河泡小飲 辛亥

朝雨洗氛埃輕颺動高樹幸逢休沐暇近郭聊放步老屋
占幽棲四面碧陰護入林翠上衣綠岸泥黏屐亭亭千萬
柄心清香遠布游魚仁東西飛鳥自來去矯首望西山濛
濛隔煙霧淼淼水一方清曠淡吾慮方今輒紅塵新舊正
猜妬何如此蕭散領略滄洲趣野老爲我言子畝逾百數
忽遭時局改當門築官路所割雖膏腴靈泉喜會注種蓮
復種稻年年仍安作不辭筋力勞敢逋水衡賦棲畝賴餘
糧聊足供歲暮計畫三九餘用備庚癸呼一家無妄費差
幸免他顧我聞野老言此理何人悟家國本一體所戒在
無度美哉丹腹新花光照官署視此戶牖古花氣沈野渡

花同地不同清景此獨遇坐中無貴客脫略形骸具石上
久盤桓林閒暫箕踞歡言酌清醅料簡到蔬茹但作風月
談何事借前箸酒酣客不醉語多轉絮絮動我泉石心安
得結茅處向晚整歸鞍黃昏又霖霖

小園詩二十四首

壬子

小園蚤誦蘭成賦吾愛吾廬拓數弓但得眼前生意滿不
須萬紫與千紅

嫣然一樹倚東垣露蘂煙梢護畫旂海內風塵還未息不
知何處是仙源

桃

光發朱鸞豔亦奇羣芳譜裏錫名宜卻同桃李爭春色蜂
蝶紛紛飛上枝

鸞枝

一株枯朽一株榮開謝都參造化情白後紅先香不斷更
看由拚自萌生

丁香

朱藤分植院東西錦綺如棚暑氣低新舊但能參一性千
條萬葉密陰齊

朱藤

新妝翻與古爲徒勁節穠華影共扶含得三分春意思一
般寫入歲寒圖

夾竹桃

白頭還喜見深紅照眼霞光五月中我與柳州同一歎卻
成古木對衰翁

石榴

碧葉四垂跗六出古人對此可忘憂修莖窈窕臨風擢蒿
目難銷萬斛愁

萱

水邊籬落畫闌陰五色分披豔意深衛足本來非一種那

知長抱向陽心

蜀葵與向日葵非一種米顏延之已誤認爲一矣

花光如織古霞枝弱質伶俜倚曲墀鳳鳥不來仙迹杳人

閒儔與好扶持

鳳仙

浮花浪蕊慮冬春欺拚凌寒各有因應讓芳醪隨律琯濃

香一月一番新月季

乞得田家老瓦盆香泥雪藕早移根何須幾畝塘開鑑花

影亭亭泣露痕荷

託根總在畫牆陰雪魄冰姿未展心遺落不聞人拾取近
來髮短不勝簪玉簪

北窗幽寂月來遲春色偏於秋後奇莫道嬌然有酸態不

隨西府共爭時秋海棠

老桂婆娑秋獨秀從來不入馬塍家數株留得江南種冷

屋深藏卻放花桂

愛菊搜求萬態新而今花事亦逡巡衰顏自笑年來悴老

圃秋容瘦過人菊

疏枝冷落暗香含雪後時開花兩三柱老鄉愁在何許定

隨清夢到江南梅

細樣新妝雪裏梢
畫簾疏影月痕交
小詩坡老兒嬉作
嚼蠟偏能爲解嘲
蠟梅

玉骨冰心冷不摧
素姿閑冶出塵埃
誰將千古靈均恨
吹入參差往復回
水仙

更無噩夢到槐安
翠舞空庭影亦寒
賸有半階秋後葉
宵來霜重作盤乾
槐

也有三竿又兩竿
閒中對此念家山
檀欒疏影牆頭出
風雨蕭蕭戶自闌
竹

何來榆柳兩三行
臥草閒花亦自芳
說比庾家園更小
儘多空氣吸青蒼

名都赫赫走英豪
病骨支離不耐勞
獨許閉門觀物變
高吟坡句首頻搔

與世無爭許自由
蠅居安穩閱春秋
小樓藏得書千卷
閒

裏光陰相對酬

雪後初晴

雲氣收層宇晴光動遠林園庭晨雪冱燈火夜寒深問字
車聲杳催詩鉢韻沈靜中領佳趣長此息塵心

陸春泉七十壽詩

癸丑

林泉怡志俗塵清矩護先民自有程書仿文淵宗誠肅教
師安定學規弘孔明素抱躬耕願叔服偏傳善相名至德
允宜編世紀不慙懷橘舊家聲

歷山星弧異彩縣古稀追數到前年春邊滿酌三辰酒湖
上齊聞九老筵賜杖久推鄉國望傳家尤喜子孫賢棟花
風裏千秋祝願補新詞壁鳳箋

夢中作

可憐破碎舊山河對此茫茫百感多漫說沐猴爲項羽競

誇功狗是蕭何相如白璧完能否范蠡黃金鑄幾何處仲
壯心還未已鐵如意擊唾壺歌

自題癸丑日記

積齡住人海閉戶謝膠擾爍居斗室中見聞遂簡少典籍
聊自娛神茶畏勤討春歸漸和煦晴窗理舊稿故聞啟新
得意解貴明了說之不厭詳疑義乃通曉世事偶然書亦
足備參攷倦來便靜坐冥心澹物表